

澤州府志卷五

傳紀內則也

內則而外之者何重有別也

澤州府志卷五

從夫女之系從父則卷帙分焉貞孝節烈悲其遇特表其行然內和理而家可長久亦賴壺德之助順也匪曰用文要取為吾宗刑于者鑒

第四世樂泉公配王孺人

浙江通志海寧查模妻王氏敬修譜廷玉公模號樂泉為仁齋公會孫貧樂公次子貧樂公治家一於禮子模娶王氏甫年十



九而模早世王矢節不移撫遺腹子泰成立年七十二卒明宏  
治中嫡姪少叅東谷公煥以聞詔賜坊旌表

七世文學五三公配陸孺人

覺菴存稿陸孺人伯兄五三先生配也孺人初歸時族衍指衆  
吾母周宐人治家嚴整有法孺人沉惠婉婉動當宐人意宐人  
每對諸母稱長媳婦賢當大吾後伯兄違世時諸孤尚在襁褓  
孺人痛絕復甦水漿不入口者旬日諸姊妯環守之強以食飲  
曰吾何愛一死以從夫子于九原所不死者諸孤在也由是終  
其身不服紈綺食惟蔬素拮据茹荼強持門戶以待子之成立



不墜其家聲孺人之於我氏可不謂有成勞也哉孺人生宏治  
壬子距卒享年六十有八子男二志學志譽俱能讀父書強力  
幹蠱女二長適朱相夫顯庸歷著風節次適何見危殉義以貞  
烈聞皆可謂不辱母訓已

八世文學東山公配徐孺人

浙江通志查懋功妻徐氏海寧縣志懋功蚤世氏年十九破鏡  
見志茅坤爲作半鏡贊按鹿門半鏡贊并序云鹽官有查婦者  
年十九而其夫懋功亡父欲奪之他嫁婦手帷中鏡而中剖之  
半以殉夫君葬其半取而佩之終其身余聞其事而系之以言



曰嗟彼鏡兮團如月半而剖之光無缺一以寘於夫之懷一以  
留爲婦之玦生同衾兮死同穴千秋之下化作雙龍劍兮雌雄  
相隨其超忽剽雲霓截虹蜺風霜轟河山烈嗚呼茲所謂發宿  
之精兮予書之名不滅

八世文學讓齋公配陳孺人

敬修譜讓齋公諱志完蚤世配陳氏係霍邱知縣中節長女撫  
遺孤數月以節終其身陳與郊誌其墓曰查茂才諱志完之妻  
吾伯父霍邱縣尹鳳岡公令女刑部尙書郎九一查公之介婦  
凡爲妻爲婦爲母以至爲祖母查之族稔賢之其奇苦凜操我



陳氏有特哀焉噫吾姊也姊孩而孝治女事而恭性貞清潔修蓋歸查不二年而茂才歿忍死抱乳下兒從涕泣中長大迎師納婦荼苦蓼辛歷四十年而子又歿且未有孫謙裕病亟投泪命之曰而嗣必立叅知伯孫而父同產而三命依以到今者也孫必孝廉第五兒兒幼且慧且聘吾從弟女吾將依之裕唯唯受命遂聚族而立憲焉嗚呼二十三而寡七十而謝世四十七年中坐臥一小閣惟二三嫗婢晨夕與績卽老矣兄弟不一踰闕見父母家相去六七里自哭霍邱公殯後不一過門其布衣蔬食簡語言脊跬步間于宗女之往見者聞之若前此服膺齊



斬跋履哀酷則又不忍言已

九世文學屏南公配徐孺人

敬脩譜尙美公諱允綦號屏南中丞忠齋公會孫早世配徐氏  
年二十七守節撫其孤大觀成立茹苦者四十五年以壽終其  
身

九世君達公元配王孺人

敬修譜王孺人硤川太和先生化成女生未及齒失所恃於內  
則諸訓往往不教而若蓋天性然及笄歸查雲夫之父君達惟  
布操作殆與桓少君伯仲翁紹和姑沈方私幸得若婦無庸慮



蘋繁居無何而里中疫翁若姑亦相繼疫俗尙鬼親戚相戒莫  
往來孺人與君達固無辭然亦竟不疫瘁心力百禱藥目不暵  
帶不解者累旬翁卒臥樓不起孺人驚躑數四傷悶自樓投地  
傷左足昏已得甦然猶哀毀踰禮勺飲不入口不以護足撒哭  
踊亦竟不就治足遂廢蓋自女爲婦請伉儷未一年也孺人曰  
吾婦道應爾廟見後皆吾事於是負楊刺紉緝績以供事孺姑  
凡可以承顏色悅心意者無不力姑勉未亡也孺人傷益甚數  
年亦竟逝先是病中恍惚見有人星冠絺衣前致詞若無子年  
亦垂盡上帝念若孝與一子以長其後寤而知其爲夢旣果舉

一子卽雲夫也雲夫猶未孩提而孺人已棄雲夫去聲容笑貌  
雲夫絕不能得蓋空望悲思號涕非一日孺人以死孝教其在  
此矣系之論曰孺人以孝成廢疾勝全歸以廢疾不忘孝因蚤  
世勝大年俱足以風

博菴黎元寬撰

九世怡卿公配虞孺人

主善齋文鈔怡卿公諱允棣北支東谷公之元孫也配虞孺人  
未有出公年二十三而逝孺人青年矢志苦節垂五十年

十世爾一公繼配朱孺人

敬修譜爾一公諱大純京兆近川公會孫蚤世其繼配朱孺人



青年撫遺孤成立遷藍樓食貧拮据持門戶以壽終

十世叔英公配胡孺人

主善齋文鈔叔英公諱大壽年二十二卽世遺一子浩生甫三歲孺人胡氏年二十一毀容矢志荼苦仔肩以存孤而浩生復中年先孺人歿孺人以撫子者撫其孫兩世孤單悉仰勤劬至八十有二壽終苦節之貞蓋歷六十一年而無力請旌先是邑侯許三禮嘗題節壽額以表其閭云

十世文學禮尺公配朱孺人

主善齋文鈔禮尺公諱大讓配朱孺人明孝廉近修先生一是



女也嫻詩書工文翰所著有壺訓集年二十三禮尺公以負寃暴卒孺人籲天長號欲絕者屢遣三歲孤撫之長教之底于成補博士弟子又性仁慈里鄙有困乏者以告輒周給之守節四十八年

十世處士千峯公配周孺人具將兩世厥單恣於主善齋文鈔千峯公諱蜚雖孺人周氏洛塘德咸公女年十八來歸舅華卿公性嚴峻家政肅然孺人事之備極敬慎越五年而翁姑繼歿千峯公居喪哀毀甫服闋亦卒孺人年二十五遺孤僅五齡有利其產者欲奪其志乃謀不利于孤孺人偵知之



亟寄其孤子路仲管氏姊其人謀不遂因太志強爲納聘肩輿  
踵至孺人持刃欲自殺乃各駭散旣又控于官舉族共憤得剖  
白其人未幾死而家業已耗矣繇是飲冰茹荼樂左支右持以翼  
子之成立又念五喪未葬鬻宅買山而安厝之孺人母錢氏老  
且無子迎養于家者垂三十年女適朱大京少早寡無子其翁  
姑歿後孺人曰少婦不可以獨處無依挈之歸俾守志焉乾隆  
四年孺人年逾七旬得請旌于朝又十有八年而卒壽九十  
女守節四十餘年以乾隆八年旌嗚呼孺人抗節于險難之餘  
以保門祚可謂難矣而比心金石有女嗣音曰稱母師女宗其



奚以過此哉

贈通奉大夫十一世其皇公配許大夫八

浙江通志查繼序妻許氏繼序蚤歿子嗣堪年甫十一氏撫之  
長令從劉宗周遊力學敦行姑目喪明寢饋室奉事惟謹以  
孫昇貴贈太夫人康熙四十四年御書節子流徽四字旌其  
門

十一世處士長生公配宋孺人

主善齋文鈔長生公諱繼庚配宋孺人結褵十載而寡又十九  
年舅梅阿公以壽終孺人上事衰翁下撫子女經營喪葬畢婚

嫁豐儉悉合禮節卒年七十有七其曾孫昌周呈請于有司以節行入邑志且爲題匾以贈曰貞萱慈竹

十一世明霞公配許孺人

主善齋文鈔明霞公諱繼寔配許孺人年三十而寡撫子嗣瑚淳成立守節四十五年前邑令許公三禮以冰心柏節額旌之

十一世元植公配周孺人

主善齋文鈔元植公諱繼培早世且無子孺人周氏年二十撫姪嗣本爲後苦節守貞者二十八年

十一世子一公配陳孺人



主善齋文鈔子一公諱圻繼配陳孺人年二十四稱未亡人以節自矢教子成立長子嗣鉉亦歿媳馬氏亦以節著稱

十一世文學二儀公配倪孺人

主善齋文鈔二儀公諱學禮爲諸生得名早會國變齋志以歿年止二十四孺人倪氏與之齊齒有子不育因撫姪維熊爲嗣守節四十年

十一世自天公配祝孺人

主善齋文鈔自天公諱夢龍大叅虞臯公孫中年無子而歿嗣子二銳兄繼甲子燮兄君翰子孺人祝氏年二十八撫教之恩



勤均一守節五十餘年

贈通議大夫十一世學圃公配鍾淑人

濟陽家乘補先曾祖母鍾淑人諱韞字眷令仁和鍾忠惠公化民孫女以才德稱宗黨當明季世先曾祖散金結客財產中落淑人處之恬如治家儉勤客至出酒食佐先曾祖懽累日夕不倦至于婚嫁供輸歲時享祀俱咄嗟立辦先曾祖讀書談道油然若未嘗貧者工詩古文詞著集若干卷疾亟時自以風雅流傳非女士所宜悉焚去先大父默識追錄六十餘首題曰梅花樓詩存憶岐昌幼時大父舉淑人詩示訓曰才名終世態學業



有家傳此吾讀書樓水時曾祖母寄示之句亦願汝曹毋忘期  
旨也

十一世聖錫公配周孺人

主善齋文鈔聖錫公諱繼繁配周孺人蚤寡無子其兒勸改適  
孺人服滿以節烈終

十一世文學翁石公配葛孺人

浙江通志查嶠繼妻葛氏年二十而寡遺娠生子嗣珪氏撫之  
長爲娶婦張氏珪卒遺孫復殤媳哭夫哭子故又卒氏乃立姪  
爲後守節四十八年

十一世文學翼爲公配徐孺人暨子婦徐氏孫媳莊氏  
公舉節孝傳略庠生查有功妻徐氏青年嫠居歷四十餘年如  
一日子嗣棟娶婦四載而歿婦徐氏年僅二十有二茹荼飲藥  
至七十有七乃終棟子克煥娶莊氏亦早亡莊守節二十四年  
三世少寡其凜冰霜人以為足維坤教云

十一世孝廉衡山公繼配盧孺人

主善齋文鈔盧孺人衡山公恩繼繼配也衡山公以公車不得  
志道病歸且卒遺子光會甫九歲而孺人亦年未三十也教養  
之成名仕歸德府通判暮年得孫未晬光會旋歿孺人復撫視



之數年壽至八十有八

十一世職監師周公配沈孺人暨維城公配陳孺人

主善齋文鈔師周公諱繼塏配沈孺人年二十九而寡遺孤凡四俱撫之成立娣陳孺人維城公繼塏配也結褵未一載卽歿居以姪爲嗣沈守節三十餘年陳守節四十餘年其廬清操人稱其二難

十一世文琰公配朱孺人

主善齋文鈔子季父文琰公中年病疫而卒子女俱殞一弟腹孤越三月而生叔母朱撫之長大勤操作然朝暮禮佛持咒以

茹素爲常弟亦不知有肉味後以糧役出竟披緇入山不返數  
年叔母篤老且病予弟嗣洪入繼又不克長其後蓋叔母之半  
生荼苦非人所能堪亦無人知之者佛安足事哉噫

十一世翰周公配顧孺人

主善齋文鈔翰周公諱蕃繼都事友峯公會孫卒年二十八孺  
人顧氏年二十九撫六歲孤嗣遠成立以禮自範守節四十一  
年嗣遠今宗長德孚兄也素履循謹益得之母教爲多

十二世文學二式公配祝孺人

戊寅譜二集公舉節孝事實節婦祝氏系出岷縣學博封雷州



司李祝文垣之女配文學查嗣瑛二十七歲而寡二孤鎬鎔尚在襁褓氏幾不欲生旣而曰吾有兩子在使其成名則夫雖死猶生也遂恩勤以撫之夙夜以誨之俱有聲庠序若雙珠之馳藝林也每有良朋滿座不減截髮剝薦之風時以曹姑之誠昭示後人守貞茹荼四十一年六十有七而卒

十二世亦林公配馮孺人

浙江通志查亦林妻馮氏亦林年二十三而歿馮以節自矢時有陰欲奪其志者氏遂自縊

十二世孝若公配鍾孺人

王善齋文鈔孝若公諱嗣登早卒配鍾孺人有遺腹子撫之長  
名克藩既婚而天孫一亦殤孺人齒少于孝若六歲而結褵不  
兩年卽稱未亡人實年二十四絕粒期以身殉翁姑泣戒之曰  
爾孕生男庶延似續孺人由是不敢言死其仰事俯育無休蠶  
織追克藩抱子矣乃謂之曰吾今日可相從爾父于地下哀劇  
嘔血臥牀不起卒年六十有一嗟乎孺人完節三十餘年而竟  
至亂絕何可令其泯泯也爲徵房族之所稱引者如此

十二世令五公配張孺人暨子婦朱氏陸氏朱氏

雲在文鈔令五公諱嗣增子從叔也叔母張氏孺人明孝廉元



峒先生孫女名閨淑質嫻姆訓庭戶之內肅而理年三十時令  
五公歿有子五人孺人撫教之不異公在日乃底于成計守節  
四十五年前邑令何公大祥以節孝維風額旌之而五人者三  
以蚤亡長在中名克瞻次方中名嵩庠生其四時中名克信以  
年則予所兄事者也在中配朱氏方中配陸氏時中配朱氏當  
癸居時皆年未三十娣姒間言哀作苦誓以靡他蓋清貞世守  
而叔母之懿行益彰宗黨稱爲四節爰合書之俾異日職志乘  
者得采錄焉

十二世公惠公副室丁氏



主善齋文鈔公惠公諱嗣和配董孺人艱于嗣中年納副室丁氏始舉一子克昊十三歲而孤丁嘉興人賢而能公夫婦歿後子身守義撫其子成立世業寔有加焉年逾七旬子又先逝慈教更及于諸孫云

十二世文來公配楊孺人

戊寅譜世系小傳書以節旌表按譜楊作牟字以音譌今正

十二世鼎玉公配馬孺人

主善齋文鈔鼎玉公諱嗣鉉配馬孺人其在閣時母氏富甲邑舉室尚靡麗孺人性弗之喜獨事儉樸子歸時年十七勤力織



作有鷄鳴戒旦之風越五載癸居子濟方稚孺人與寡姑陳相依者十二載守節共六十三年於乾隆七年題旌

十二世明經又李公側室王氏

浙江通志錢塘查梓妾王氏梓客于秦年六十矣娶氏挈歸食貧操作者十年梓歿氏號哭不絕聲供饌月餘服滿死按庶常章藻功思綺堂集查烈婦序其略曰產自秦關來從澗水三千里外非圖門戶之私十一年中但諉衾裯于命笑言不苟舉止攸安處側室以堪憐號大家而靡媿乃潼川易簣之墳眷戀何曾而烈婦舍飯之餘從容早決同歸幽壤逢人羞說一天私語



靈筵待我稍遲一月嗚呼薺都是苦而荼本非甘梅可曾和而鹽將焉作親調潤下斷比猿腸自分全中飲同鳩羽云云

十二世讓顏公繼配王孺人

主善齋文鈔讓顏公諱嗣曾中年續配王孺人生子聖藩未離襁褓而公卽世孺人年二十五矢節撫孤無何聖藩長以貧故走依堂伯任所竟客死于粵苦守四十餘年

十二世修令公配孫孺人

公舉節孝傳略查嗣楷妻孫氏年二十七夫亡家故貧寒暑蓬垢勤織紉以事翁姑死爲治殮具歲飢不克葬百計經營卒并



夫棺擇地厝之遺一子九歲長爲娶婦有孫五人垂老而子先  
卒計守節五十八年

翰林供奉十二世初白公配陸孺人

敬業堂文集先室陸孺人爲辛齋先生第三女丁未正月自陸  
來歸外舅及先君子方結納四方賢豪不事生產家計益落合  
卺之夕外舅手書致先君子曰練裳竹筒牽犬繫羊弟并無之  
所恃知我耳孺人釵荆裙布處之恬如其侍翁姑也不詔之坐  
不敢坐不命之退不敢退惟恐有失以違姑嫜意壬子春吾母  
見背予與仲弟德尹析筋時新舉大喪饗殮不給予督率老婢



子墾隙地種茄以續食孺人課蠶桑勤紡織以佐不逮如是者七年旋奉先君諱予決策遠行二十年於外館穀所入間一內顧孺人必曲爲會計恢贖先世廢業屑麥作糜摘蔬供匕下與臧獲同甘苦癸酉秋兒建登鄉薦予亦舉京兆始破顏一笑而茹苦不異曩時予怪而叩之徐答曰君不記種茄時耶爲黔婁妻三十有三年中間營兩器娶兩媳枝持門戶整理田廬畢耗其心神而繼之以死此五十老鰥所爲涕泗之橫集也

十二世王臣公配唐孺人

主善齋文鈔王臣公諱嗣蓋紹庭公之後聖匹公幼子年二十



二卒戊寅譜書蓋殤而不知其配之有唐孺人能以節終也孺人歌寡鵠年二十五貧無立錫地勤女紅以給饗殮而畱其歲久貲少積爲營葬于祖塋旁年七十有三卒聞之其從孫昌瀚云

十二世金門公配朱孺人

公舉節孝傳略查金門妻朱氏年二十六夫故撫嗣子克操成立守節四十五年前署令趙公光榮以代終履潔額旌之

十二世子曾公配翁孺人

公舉節孝傳略查子曾早世妻翁氏年二十八無子撫姪爲嗣



已娶而天竟不能長其後所遇最爲屯蹇守節計四十餘年

十二世少宗伯橫浦公繼配史夫人暨子中翰升九公配

孺人浦氏

主善齋文鈔橫浦公諱嗣庭歷官禮部侍郎史夫人其再續配也行人司封檢討仁和史鑑女雍正丙午侍郎主試江西旋因獲罪與子克上俱下刑部獄變聞于家史卽與克上婦浦氏約自盡曰我與若罪人家屬縱不至死然拘係之辱無可幸免皇仁寬大豈禁其畢命閨闈乎遂自縊浦因賦絕命詞四章其一云罔極深恩未少酬空貽罪孽重親憂傷心惟恨無言別畱



取松筠話不休亦吞金死直隸按察使嘉善浦文煥之女也嗟  
夫死亦不同矣以無所逃罪之時而自決一死未可爲男子訓  
乃其出於女婦則難已况非刑典所必誅乎觀史夫人語可不  
謂能審輕重抑又難之難者歟浦之詩略無怨意是宜竝錄之  
如合傳例

十二世國學惟一公配周孺人

主善齋文鈔惟一公諱安卒年二十六一子德隅亦殤孺人周  
氏誓不渝志孝事舅姑撫教嗣子成立以節終乾隆三年旌

十二世襄承公配陳孺人



公舉節孝傳略查嗣服妻陳氏年二十八夫亡子克定生甫彌月家極貧仰事俯育備嘗艱苦舅姑歿經營窶窶心力爲瘁克定又早妖氏復撫兩孫常身親督課守節四十三年

贈承德郎十二世咸齋公配虞安人

海寧縣志列女傳閨秀虞安人名瑤潔字曉鑒秀水孝廉贈侍御相堯之女歸贈編修康熙癸酉副榜查魏旭性貞靜工詩字以子祥覽貴得累贈

十二世振衣公原配沈孺人

榮古堂文集碩人姓沈爲平泉公女沈吾寧儒族碩人稟性孝



純年十九歸振衣予從叔公輔公之仲媳甫八門卽勤女紅孝  
養倍至處妯娌如兄弟而振衣嬉戲不肯向學又不肯以經商  
爲念碩人苦口再三并懇同堂伯叔姑勸勉終無悛改心如是  
者三年碩人曰婦人以夫爲天今天不悔禍何以人爲遂投繯  
而殞後三年康熙戊寅予重修家譜世系內書碩人勸峻力學  
不從自縊振衣因碩人之歿亦能痛改前非己丑秋予出宰太  
和庚寅冬振衣至署時予兼大理司馬篆爲料理諸務井井且  
請予作碩人傳以俟他年修誌乘者采擇不忍令其死而泯滅  
碩人可無憾也已



十二世日宣公配顧孺人

公舉節孝傳略顧氏查嗣鼎妻年二十四寡事姑孝撫孤克邁成立守節五十五年病革克邁剖股以進卒年七十九

十二世又新公配朱孺人佩雅公配譚孺人

主善齋文鈔又新公諱嗣銘佩雅公諱嗣銑再從兄弟也俱蚤世又新有子三朱孺人以母兼父職撫育婚娶拮据持家苦節四十年佩雅配談孺人三十而寡子五人鞠養之弗恤其勞計守節已三十五年

十二世文學啟雲公配張孺人



主善齋文鈔族弟啟雲諱文廷臣公長子爲邑庠諸生年未三十而卒遺一子五歲厥配張矢節撫孤教之讀父書現守二十餘年於君姑節孝周太孺人之懿範不媿也行俟令典相符公舉請旌

十二世靜方公配陸孺人

公舉節孝值略查演妻陸氏結褵後演卽病臥牀褥舅姑相繼歿未幾演亦死時氏年僅二十有一無子撫姪爲嗣旣長復天氏自傷命瀟扁戶堅守者三十一年嚴霜冷月有古貞淑遺風十三世商賢公配董孺人



主善齋文鈔商賢名克璉配董氏年三十爲未亡人遺一子二女撫之長男爲娶婦女各遣嫁歷盡艱辛節壽七十三歲

十三世時雍公配夏孺人

公舉節孝傳略查時雍妻夏氏年二十三而寡家貧無子矢志不移常爲族人賃織以餬其口守節五十四年

十三世汶長公配朱孺人暨女徐節婦

主善齋文鈔汶長名克偉配朱氏年三十而寡鞠育子女守節餘四十年女適徐集三二十四夫故以節自厲現年七十八歲

十三世元宰公配俞孺人



公舉節孝傳略查元宰妻俞氏年三十夫亡食貧撫孤守節四十餘年

十三世文學穎達公繼配胡孺人

公舉節孝傳略庠生查克寅繼妻胡氏年二十八寡事姑撫子守節四十三年

十三世靖瀾公配徐孺人

主善齋文鈔靖瀾名克澂叅政紹庭公派御李公子也世居省城靖瀾二十四早夭配徐氏撫姪爲嗣守節終身於乾隆四年題旌詳錢塘縣志



十三世文學魯傳公側室李氏

公舉節孝傳略庠生查洙妾李氏佐中饋愜大婦意大婦病躬侍湯藥不少懈年二十三寡大婦繼歿兩營喪葬撫嫡子如已生嫡子死又撫其孤守節三十七年

十三世元度公配鮑孺人

公舉節孝傳略查泓妻鮑氏年二十八寡事祖姑及舅姑惟謹子少教養之底成立守節三十一年

十三世西山公配朱孺人

公舉節孝傳略查鏗妻朱氏年二十六夫客死金臺時舅姑垂



白乃勉視息奉甘旨歿後舉喪葬遺孤天撫嗣子成立守節三十六年

十三世文學曙蒼公配沈孺人暨子婦許氏

公舉節孝傳略查吳振妻沈氏年二十九寡事舅姑孝舅得奇疾侍奉藥餌如子女撫兩叔成立相繼而天孤長娶婦許氏甫生孫又歿時許年僅二十家無寸土餽粥不給姑媳孀閨相依其矢貞操里鄙稱之氏守節四十一年

十三世莪山公繼配徐孺人

海鹽縣續圖經徐氏查莪山繼妻夫亡無子年二十七勤女紅



持門戶營葬供祭經理嗣子婚娶人稱其節而有才已旌

十三世文學井木公配朱孺人

海鹽縣續圖經朱氏庠生桐女年及笄歸查克焯事舅姑盡孝道焯力學能文補博士弟子員日夕攻苦遂成疾卒年二十四方疾時氏侍湯藥衣不解帶及危篤以身代禱于天夫亡髮跣號泣矢志柏舟其于堂上黽勉有無身兼子職寒燈孤幌服勤女紅十指不少閒飲麩茹茶長齋繡佛歷五十餘年如一日例得膺旌表嗣子行昌欲以節行上之當事氏曰從一而終分內事也焉用是爲不許君子愈賢之行昌乃叔康所出杭州府學



生有文行

十三世南渠公配許孺人

乾隆五年旌載邑志

十三世學臯公配任孺人

主善齋文鈔學臯名克襄年二十七而卒配任氏少孀砥節無子撫姪爲嗣

十三世台三公配顧孺人

主善齋文鈔台三名治卒年二十六配顧氏年二十八一子僅週歲氏撫之長織作躬勤守節二十三年



十三世天原公配馬孺人

主善齋文鈔天原名克鉅繼配馬氏三十而寡長子三歲次遺腹氏食貧茹苦撫之成立守節逾四十年現年七十有一

十三世尹仲公配葛孺人祖虞公繼配錢孺人

主善齋文鈔尹仲名衡祖虞名陳齡尹仲二十四而歿配葛氏年二十一家貧無子孝事舅姑二十餘年姊錢氏生子儀昌甫十三日而孤方祖虞有疾錢割臂和藥以進病得稍減越歲舅復安公歿祖虞擗踊嘔血遂不起時氏年二十有五姊姒相依紡績自給雖斷煙絕炊不向親族稱貸卒能撫孤成立教之讀



書入黌序葛守節三十一年錢守節現已三十年儀昌蓋後于伯氏而兼奉本宗云

十三世孝廉同生公繼配金孺人側室萬氏

主善齋文鈔同生名克紹弱冠舉順天鄉試金氏其繼配也結褵兩月而寡初白大兄哭姪紹詩有新婦爲癡婦猶遲廟見辰句并言其割股和藥事後舉腹孤昌業金撫教之一子昌蔚側室萬氏出纔周歲萬氏撫之依金居津門其凜冰霜矢節已三十五年

十三世文學偕維公再繼配祝孺人



主善齋文鈔借維名克新配沈氏繼祝氏俱早卒一子昌枌繼  
出也幼未就傳復謀婚于祝結褵二載借維歿氏撫前子成立  
辛勤操作苦節二十餘年

十三世履祥公聘孫貞女

巖門文集族叔履祥系出五三公支下所居名西河口幼聘農  
家女孫氏未娶而叔歿貞女麻衣鬢首赴哀依姑侍養勤紡績  
供祭祀年六十五矣嗣子迪前請有司旌表世儒或議其于禮  
過中非古也予乃爲作說貞云

十三世修士公配周孺人



主善齋文鈔修士名克潮參政紹庭公派居杭城配寧邑洛塘  
周氏修士歿時子昌海尙幼次昌霄後八日始生氏依母兄以  
居撫教其子成立守節三十年昌海今爲邑庠諸生

十三世南陽公繼配孫孺人

主善齋文鈔南陽名克保繼配孫氏年二十六夫亡長子二歲  
其次尙在孕氏銜哀誓節勤操作以撫其孤俾俱成立歷今已  
三十六年

十三世九如公配馬孺人

主善齋文鈔九如名克儔卒年三十二配馬氏孝廉廷贊女孫



十三世仲山弟配葛孺人

覽 桐山

傳有之聖達節賢守節節固男子事也古之君子知節之爲重雖富貴在前刀鋸在後無所歆無所畏而不肯喪其所守後世士大夫不識此義遂以讓之於婦人之喪夫而矢志靡他者則曰守節而婦人能明大義者亦遂以之自任雖備歷艱難險阻當天人交困之際烈丈夫不克自持一弱女子獨能忍死而不肯喪其所守終以成吾初志焉嗚呼其賢於人遠矣余於從弟仲山妻葛節婦有感焉節婦爲文學乾一先生女蚤歲喪母哀號不食若成人父續娶沈氏節婦事如所生母賢亦視如已出



余叔父梅廬公聞而慕之聘爲次子仲山婦仲山早年力學有  
文名寒夜讀書不輟成瘵疾尪羸不勝衣余嬸母病思見新婦  
遂成婚禮廟見後奉湯藥衣不解帶者累月嬸母喜謂人曰聞  
新婦事母孝今事我又然殆天性也嬸母歿仲山哭母嘔血數  
日不能止節婦方侍姑疾送姑死哭泣未已而所天復病不能  
成躄踊稽顙禮然猶仰天長號痛不欲生節婦於此勸之不能  
聽之不可惟以翁老須奉養大義責之仲山始稍食粥糜不卽  
捐生然自此頻頻咯血病益深而不可爲矣居無何產一女仲  
山視之曰生男猶可守生女何爲者節婦含淚育之仍強起視



夫湯藥夜告天割股肉置藥中冀得愈乃姑亡未期夫又卽世無可繼爲嗣者節婦於是呼天搶地欲以身殉余叔父再三勸慰以仲山有兄弟繼嗣且有待不慮無後于是忍死育女女復不育嗚呼天之阨節婦如是哉夫人卽酷虐其於所甚怨之人苟不至於欲其死者折挫之困抑之終猶將寬之迺天之虐節婦竟不畱餘地以處之乎然猶如是而止天之阨節婦未爲甚也蓋節婦喪夫時年二十有一兩家皆富厚衣食豐足節婦未甚困也乃不數年余叔父以訟事破其家卽節婦箱奩中物無有存者葛翁老值連歲饑饉資產日削自是饔飧不繼炊烟常



絕節婦雖一絲一粟盡出以助其翁而節婦愈困矣旣而余叔父欲析箸節婦受田十餘畝始則分粟少許未幾徒有國課累又未幾化爲烏有節婦勿問也率婢勤紡績每夜半機杼聲猶未已得甘旨必以敬翁翁歿治喪盡禮葛翁復謝世蓋自此而節婦之困愈甚矣然斯時也仲山之長兄五雲季弟祖虞年俱壯訓蒙餬口不能顧節婦而節婦方恃有伯季他日生兩子卽可繼其一以爲後而支持門戶賴有伯季可無關念不謂余叔父歿後不及一年五雲祖虞相繼而亡一門之內死喪殆盡長姒蔡一子甫八歲季姒錢生子未彌月嗚呼節婦自稱未亡人



以來日夜所懸懸而望者繼嗣有人俾仲山不爲若敖氏之鬼  
今已矣夫復何望哉而季妣錢時年二十五以是藐諸孤力難  
獨撫欲與節婦共撫之異時使主兩房祀有兩孫始分主焉節  
婦當無可如何之際萬分中無毫毛想得是言尙可冀一綫之  
傳遂相與撫而教之其爲仲山似續計蓋亦苦矣節婦有兩弟  
後母出也性孝友雖貧時迎節婦於家養膳之節婦年五十卒  
所相與共撫之孤年十五讀書能文章季妣錢令其爲節婦三  
年服主祭祀宜也錢爲祖虞繼室苦節撫子有成蔡爲五雲婦  
寡時年四十撫子長娶張氏不一年子歿遺腹生孫姑媳同撫



一門四寡熒熒孤苦衣食於十指豐年常饑餓凶歲每至糟糠  
無所得人世之困殆無有過於是者而葛節婦寡言笑同室常  
不聞其聲貧至無以舉火闔門紡績不向人言處妯娌和御下  
寬而有法居孀後不赴晏會不往親戚家舉動有禮宗族教女  
者咸取以爲法今節婦沒且三年遺棺未葬坊表未營將以待  
十五歲之孤嗚呼此葛節婦之窮困所以獨甚於世之凡爲節  
婦也夫



十三世祖虞公繼配錢孺人傳

張頌可

余以襁褓中遭孤露弟兄四人伶仃孑孓繼喪兩世父而仲叔並出嗣又踰年而王父歿伯氏亦病瘵早卒三世十年相繼祖謝煢煢無告一綫僅延賴吾母苦節自貞長養教訓俾吾弟兄均得娶妻生子承三支似續之傳綿九世詩書之澤余雖瓠落不能顯揚而請旌入祠母氏懿行志乘固班班可攷節母錢氏查祖虞先生之繼室而吾友華瞻之母也余與華瞻同入膠庠所居僅越數武習聞其孝而稔知其母之節尤苦今秋節母病歿華瞻以其狀來丐余傳其略謂余亦少孤凡含荼茹蘖之艱



辛苦雨淒風之景况兩家遭際不殊則言之倍親切有味也余不敢以不文辭謹按狀節母考諱琳邑庠生妣黃氏未及笄而失恃遭喪哭泣哀感路人時梅廬查翁赴信習聞其賢旋爲子納聘焉年二十三歸于查查本海昌鉅族射圃亭一支瓜瓞尤繁衍梅廬翁生子四人祖虞先生居又次母初入門孝奉邁翁和洽娣姒有無黽勉勤儉賢勞翁每嘆爲所見更勝所聞云越五年翁歿祖虞先生居父喪以哀毀得咯血疾母默禱北辰願求身代一夕剖股和麋進藥熟視其左手若作痛楚狀曰汝有妊當爲子延一脉何殘毀其身至是答以他故迄不令知疾漸



革而華瞻生甫十三日而所天喪節母有兄四人俱庠生稱未  
亡後往依其兄以居教其子讀書最以自立一廬之庇上兩旁  
風夜紡寒燈機聲與書聲時聞達曙饑寒艱苦之狀余兩家大  
略相同是惟華瞻與余默喻之雖欲和淚吮墨以告諸人而有  
所不忍言也節母之夫兄弟當時俱相繼卒伯妣僅一子仲妣  
葛少寡無子亦相依母家以居歲除同歸各懸其翁姑夫像於  
堂相對嗚咽哭失聲及仲妣卒母乃令其子服三年喪曰奚忍  
次房之獨無後也厥後華瞻生子二母曰今而後可無廢祀矣  
自祖虞先生歿後數十年母蓄志針黹所積日減薪水之費數



文納諸篋中以爲寤寐計歲壬辰相國文勤陳公與查爲中表親憐母之苦而重母之節贈仁和之山地一區始克成其事乃奉翁姑與夫并前氏洪及仲妣之匱葬焉乾隆五十三年以例請旌州志節孝先有傳其嘉言懿行里黨莫不共聞余謹述其梗概而境遇之苦操守之貞尤與吾母相同詮次之下不禁涔涔淚漬也祖虞先生諱陳齡子儀昌卽吾友華瞻云



十三世職思公配祝孺人

州志祝氏查哲思妻年十九歸查結褵一載而哲思歿無子女家貧日事紡績以養舅姑年垂六十未嘗倦勤

十三世裕堂公配俞孺人

州志俞氏查克開妻夫以力學成療疾又遭母喪遂毀瘠而歿時氏年二十有七遺孤俱孩提家貧無宿儲氏茹苦矢志撫子成立守節已三十年

十三世保之公配王孺人

州志王氏查克家妻年二十八寡遺孤二一尋以痘殤次者甫



三歲氏殫心鞠育稍長為聘媳童養以撫教之翁姑衰老藉操  
作以供菽水守節已三十年

十三世翰方公配馬孀人

州志馬氏查克宜妻苦志撫孤以節孝聞

十三世景范公側室董孀人

州志董氏監生查炳側室苦節三十七年

十三世倫超公繼配曹孀人

州志曹氏查克嶙繼妻青年守志卒年七十四

十三世巨高公配吳孀人



州志吳氏查克元妻撫孤以節終

十三世沛行公側室王孺人

州志王氏考授州判查克灝側室守節以終

十三世永高公配康孺人

州志康氏查克勝妻撫孤成立既授室而卒復撫幼孫未冠又矢志四十七年卒年七十三

十三世廣倫公配陳孺人

州志陳氏查克達妻撫孤以苦節終

十三世延臨公配胡孺人



州志胡氏查克晉妻矢志撫孤

十三世聲楚公繼配許孺人

州志許氏查鳳輝繼妻以節自矢撫育遺孤

十三世恕堂公配潘孺人

州志潘氏查灝妻二十三寡卒年七十八



十四世明庚公繼配朱孺人

公舉節孝傳略郡庠生查兆星繼配朱氏海鹽庠生梁女氏有弟早歿父母卒因赤貧無繼氏變釵釧而殯葬焉年二十九夫故事姑孝訓子嚴以紡績佐讀長子南金名噪膠庠次子應奎奕章俱以力學致疾歿氏常飲泣暮年幾喪明守節四十餘年壽七十而卒

十四世勤三公配朱孺人

州志朱氏查勤三妻事舅姑孝年二十六寡無子家復貧甚屋數椽僅容膝地絕饒且不盈畝氏布蔬自甘無愁苦色厥後叔



氏生子乞撫以繼先祀守節三十一年

十四世受之公配陳孺人

州志陳氏查昌詩妻年二十七寡家貧躬勤紡績鬻嫁時簪珥治兩世喪葬撫姪奕義爲嗣守節三十一年

十四世繩其公配裴孺人

州志裴氏查昌祖妻苦節撫孤

十四世端行公配金孺人

州志金氏查昌表妻年二十五寡力營葬事撫嗣子守節三十五年



十四世六田公配湯孺人

州志湯氏庠生查昌時妻錢塘人雲南劍州府通判涵女也昌時游學津門卒於旅邸一子甫五歲與昌時同日死時氏年二十有七方哭子於家旋聞夫訃痛不欲生以舅姑羸老忍死家貧百計構貲迎旅櫬歸而舅姑復歿氏椎心泣血竟至喪明守節二十七年

十四世禹班公繼配馮孺人

州志馮氏查昌俞繼妻年二十五夫亡食貧力作事舅孝撫前妻子肖巖既成立而天爲夫營葬并葬前妻朱氏而以子祔焉



守節三十二年

十四世行中公聘祝貞女

州志祝貞女父名書紳幼許字查臨昌臨昌歿女聞訃卽易縞素請於母兄願奔喪守志母止之卽泣拜曰兒無歸矣願終身執婢子役老於此所母領之已而哀其年少私議改適女偵知之遂絕粒死時年二十有一

十四世心傳公聘張貞女

州志張貞女許志孝廉張次仲曾孫女諸生詡女也生三歲爲繼祖母吳氏所撫朝夕不離左右幼許字查德昌甫議婚而德



昌死訃至貞女御素服握髮椎髻六年如一日疾革乃哽咽呼其父曰初兒以弱女子雖有言不敢告今且死矣忍令大人不明此志乎當兒遭所天之變不難捐軀以報第念祖母老姑緩數年耳是夕夢所天來有生不同衾死當同穴之訂今所天如期至兒可從此逝矣語畢遂絕時年二十有六鄰里莫不哀之謚曰貞孝

十四世傳謨公繼配許孺人

州志許氏監生查昌詒繼室許州知州許莖女也氏通書史舉動必遵禮法娶居日前氏子奕茂尙幼茶苦中撫養成立得延



先緒守節十有三年卒

十四世惟寅公配張孺人

州志張氏查昌禮妻年二十八寡家貧勤紡績以資薪水值歲歉奉祖姑及舅膳養無缺已與子女二人厭糟糠而已喪葬婚嫁咸藉蠶織所出夫所遺徹屋三楹桑地二畝卒未嘗廢棄守節五十一年伯妯陳亦青年守志人稱雙節

十四世用良公配段孺人

州志段氏查昌元妻年二十二寡事舅姑以孝立嗣子守節三十一年



十四世培元公配王孺人

州志王氏查德昌妻矢志終身撫孤成立

十四世廷楷公配朱孺人

州志朱氏監生查堅妻苦節三十二年

十四世發音公配富孺人

州志富氏查昌祚妻無子苦節終身

十四世立誠公側室管淑人

州志管氏貢生查肇昌側室青年矢志以嗣子念祖官誥封淑

人



十四世聖金公配王孺人

州志王氏查德昌妻守節撫孤

十四世南岡公配邢孺人

州志邢氏查應昌妻年三十寡撫嗣子奕鑰

十四世洪範公配祝孺人

州志祝氏查昌德妻少寡苦節遺孤奕綱甫五齡撫育成立壽

八十四

十四世日佳公配胡孺人

州志胡氏查昌晄妻早寡守節撫嗣子世洽



十四世繩武公配胡孺人

州志胡氏查昌助妻守節撫孤以終

十四世澄之公側室翁孺人

州志翁氏舉人查澂側室苦節三十載卒年五十二

十四世思周公配黃孺人

州志黃氏查昌斌妻矢節撫孤已十六載

十四世德全公配陳孺人

州志陳氏查吉昌妻少寡守節

十四世雲龍公配馬孺人



州志馬氏查虬昌妻撫兩嗣子先後成立成婚劬勞倍至

十四世敦仁公配金孺人

州志金氏查昌閨妻二十六寡於艱難困苦中守節撫孤

十四世昌年公配孫孺人

州志孫氏查昌年妻苦節撫孤

十四世壽朋公繼配俞孺人

壽朋公諱昌裕繼配俞孺人二十八歲守節現年七十

十四世用和公側室鄔孺人

用和公諱昌貴側室鄔氏二十八寡守節已四十四年



十五世翼菴兄配王孺人

嫂王氏爲兄翼菴原配兄與余同出自六世祖宏所公嫂幼沉靜寡言笑讀書知大義稍長勤針黹事母潘病劇衣不解帶者累月母瀕危復安人以是藉藉稱賢而伯東槐遂爲兄納聘十八歲賦于歸以孝事邁翁以敬相夫子以和處妯娌以誠共祭祀咸謂所見如所聞焉兄幼習舉子業家故貧方冀有所成立以爲祿養計卒以闡薦不售抑鬱成疾嫂籲天叩祠請以身代無何疾竟不可爲于乾隆三十七年五月卒方是時呼天搶地幾死者數矣特以邁翁尙在堂無人供甘旨而孤子國蕃方三



歲誰爲鞠育徒以身殉是所謂俯仰俱負者也遂幡然曰非薄命不遽喪所天非薄命不能終所天之事也于是強復節哀順變伯年逾七旬時卧床蓐他病屢作嫂典鬻衣飾延醫治不以艱難之情使翁得聞蓋恐傷高年心也兄歿後逾二年而翁故盡哀盡禮心力交瘁子六歲就塾歸計其功課夜則煨芋以誘讀功稍輟卽愀然曰祖父世業讀書爾竟自甘暴棄耶國蕃稍感悟發憤勤學後以屢試不得志爲其子入太學居平極刻苦紡績至夜半不<sup>以</sup>飲冰茹蘗無以過時先伯祖尙未葬乃殫數十年織紵之資<sup>以</sup>三世窀穸之計爲兒別營地于西坵之南嫂



亦豫築丙穴復以餘力築屋三楹爲國蕃成婚計大采細桷各得其宜夫以一婦人歷艱難茹荼苦矢之死靡他之志卒能延一綫之傳綿不絕之緒生養死葬竭力殫心迺復爲子援例授室繼又拓其餘地作一廛之庇是女子而有丈夫之行也詩曰釐爾女士此之謂矣嘉慶九年卒卒時年六十二國蕃于十六年請旌入祠迄今歲時祭掃晤國蕃於宗祠述及母氏之勞未嘗不潄潄淚下也嗟乎母之賢可知矣而國蕃之孝思亦可謂不匱云

道光丁亥歲孟冬上澣小叔行時濟撰

十五世耐寒公配湯孺人



州志湯氏查奕楨妻結縵四載夫亡氏年二十有三矢志靡他  
上事舅姑下撫嗣子守節四十年

十五世文炳公配金孺人

州志金氏查奕龍妻少孀守節

十五世天中公配董孺人

州志董氏查奕豫妻二十七寡撫嗣子卒年四十九

十五世允師公配張孺人

州志張氏查奕載妻守節撫孤

十五世懷親公配朱孺人



州志朱氏查奕思妻二十七寡撫孤成立卒年七十九

十五世見遠公配馬孺人

州志馬氏查奕明妻守節撫孤

十五世沛然公配王孺人

州志王氏查奕忠妻二十四寡撫夫弟之子爲嗣卒年七十

十五世怡廷公配顧孺人

州志顧氏查奕佳妻守節不渝

十五世致和公配陳孺人

州志陳氏查奕義妻撫嗣子苦節三十七年



十五世龍田公配鄔孺人

州志鄔氏查奕廷妻矢志撫孤

十五世邃堂公配印孺人

州志印氏查慈蔭妻二十七寡撫夫兄子世佐爲嗣卒年四十

六

十五世誠中公配施孺人

州志施氏查安徽妻以苦節終

十五世巽申公配錢孺人

州志錢氏監生查鵠峙妻少孀守節



十五世惠芳公繼配都孺人

州志都氏查奕敏妻二十八寡卒年五十八

十五世奕曾公配俞孺人

州志俞氏查奕曾妻以守節終

十五世銘齋公配陳孺人

州志陳氏查建球妻貢生嘉禾女年三十食貧矢志卒年六十

七

十五世德馨公配顧孺人

州志顧氏查奕蕙妻二十七寡守節二十六年



卷五  
三六  
十五世培之公配祝孺人

培之公諱奕發配祝孺人婚甫兩月而寡苦志撫姪葵爲嗣守節四十四年

十五世奕高公配姜孺人

奕高公配姜孺人二十六寡守節已三十七年

十五世奕範公配黃孺人

奕範公配黃孺人二十六寡卒年六十四

十五世宜承公配沈孺人

宜承公諱奕繩配沈孺人於二十一歲守節



十六世世裘公原聘曹烈女墓誌銘

秦瀛

烈女姓曹氏浙江海寧人父某力農家甚貧幼許字查世裘明  
順天府尹秉彝十世孫未婚而世裘之父先迎烈女至其家烈  
女性婉婉舅姑俱篤愛之迨年二十有一婚有日矣而世裘天  
烈女哀慟不欲生舅姑慰譬不從卒閉門服溲死時爲乾隆癸  
丑九月五日其鄉人將白諸州以聞上官而旌其門閭世裘之  
族父查揆先賦烈女行悼之並丐余誌其墓禮曰女子幼從父  
兄嫁從夫未嫁而殉其夫歸震川氏以爲過而汪氏鈍翁著宋  
烈女傳則以忠孝義烈之行足以砥厲末俗而不嫌其矯激蓋



汪氏之詞甚辨夫未嫁而以身殉夫雖稍過而不失其正况烈女縱未成乎婦而幼撫于舅姑則夫婦之義已著尤與未至夫家而夫死者不同孔子之答曾子問曰取女有吉日而女死壻齊衰而弔旣葬而除之夫死亦如之此言女子於其夫之死必服斬衰以弔也未嫁夫死而服斬衰以弔此禮或不行于今若烈女已至夫家則於世裘之死其服斬衰無疑旣服斬衰一旦除凶服去而他適此義之所不敢安也先王制禮準乎義與情而爲之制情所難強固不欲強中材以必從而賢智之過卽過乎情而未始不合乎義亦未嘗不樂予之以正人心而厚風俗



如烈女者矢不二之節忼慨引決較然不欺其志豈非聖人之  
所許耶烈女以某年月日與世裘合葬於某原余重其義迺爲  
之銘辭曰

海昌之陽來悲風些連蜃冬青鬱蒼松些貞魄其藏閟幽宮些  
化爲子規晝啼血些生不同衾死同穴些海波不竭名不滅些

十六世碧城公配任孺人

嘉興府志孝女傳海鹽縣任孝女名德姑廣文宗延女幼時母  
疾奉湯藥不離側勢劇顛天割股以進掩其跡後爲姊氏覺泣  
告勿宣長適海寧諸生查世鴻事邁姑亦以孝聞



十六世敬承公配沈孺人

州志沈氏查曾妻少孀苦志以節孝聞

十六世映山公側室李孺人

州志李氏吏科給事中查瑩側室年十八瑩卒守節三十六年

十六世信斯公配王孺人

州志王氏查世成妻無子苦節以終

十六世信孚公配陳孺人

州志陳氏查可復妻節婦查氏女父治初監生氏年二十而寡子庠生榮春遺腹生苦志守節勛之有成平居紡績至老不衰



十六世子敏公配沈孺人

州志沈氏查振武繼妻二十九寡撫子成立

十六世超然公配許孺人

州志許氏查世椿妻庠生三珠女婚半載寡時年二十一事翁姑謹迨相繼沒百計殯斂復罄匱資以營葬現年五十五

十六世剛大公配沈孺人

州志沈氏查世灝妻世灝暴卒氏年二十七撫夫兄次子爲嗣  
壽八十一

十六世崑源公配孫孺人



州志孫氏查世承妻撫孤守節

十六世匡六公配陳孺人

州志陳氏監生查世謙妻二十九寡子有慶又早世嘉慶癸亥  
嫠婦陳病亡越二月氏亦卒

十六世漸農公配陳宜人

州志陳氏贈奉直大夫福建西河場大使查磐繼妻守節撫孤  
以子念修官封安人以孫人鑑官晉贈宜人

十六世佩和公繼配徐孺人

州志徐氏查世璜繼妻二十九寡撫遺孤二



十六世世培公配孫孺人

州志孫氏查世培妻苦志矢節撫孤鳳齡又殤

十六世康侯公配賈孺人

州志賈氏查世榮妻二十八寡止一女藉鍼刺撫之守節三十二年夫姪有斯祧嗣

十六世世賢公配顧孺人

州志顧氏查世賢妻二十八寡遺孤甫五齡撫之成立卒年六十一

十六世方伯公配袁孺人



州志袁氏查世達妻二十四寡守節俟繼

十六世松亭公繼配宋恭人

州志宋氏贈中憲大夫候選同知查世榮繼妻二十四寡子有  
圻越四十二日生因夫兄無後命嗣之卒年五十

十六世健青公繼配沈孺人

州志沈氏查天行繼妻婚甫二月寡時年二十五慟絕復甦矢  
志孀閨撫前出子二成立

十六世啟元公配徐孺人

州志徐氏查榮妻年二十二適查甫一載寡矢志守節教育遺



腹子

十六世世進公配蔡孺人

州志蔡氏查世進妻嫁甫百日世進患痘卒氏年十七矢志孀  
閨急機絞以事翁姑撫嗣子卒年七十四

十六世蓉堂公配儲孺人

蓉堂公諱世芬配儲孺人年二十六寡撫嗣子有琳成立守節  
已三十三年

十六世荆珩公配陳孺人

荆珩公諱世璫配陳孺人年二十三夫亡守節已四十九年



十六世世琛公配林孺人

世琛公配林孺人同治壬戌六月初六日寇至赴河殉節

十六世新順公配戴孺人

新順公諱世森配戴孺人二十八寡守節五十年而卒

十六世補之公側室張孺人

補之公諱世咸側室張氏年二十六寡守節已五十八年

十六世堯人公配馮孺人

堯人公諱佺配馮孺人年十七而寡孝事舅姑力營喪葬撫有

亭爲夫後苦節以終



十七世春林公配陸孺人

州志陸氏庠生查有品妻廩貢儀廷次女婚九載有品客死宿  
遷舟次氏年二十八銜哀事姑益勤女紅積數十載紡績資祔  
葬夫櫬於翁姑側教子人文有成卒年四十九夫兄有新爲之  
請旌

十七世民瞻公配陳孺人

州志陳氏廩貢候選訓導查有慶妻青年守節

十七世有成公配沈孺人

州志沈氏查有成妻守節撫夫弟之長子爲嗣



十七世聖全公配李孺人

州志李氏查有麟妻年三十寡守節撫孤卒年四十八

十七世心載公繼配施孺人

州志施氏查有凝繼妻二十四寡撫遺腹子入學成立

十七世澹然公配翁孺人

州志翁氏查有恬妻二十一寡撫夫兄之子入懋為嗣

十七世樂三公配賈孺人

州志賈氏查有奎妻歲貢丙麟女嫁未一年寡時年二十事孀

姑撫嗣子現年三十九



十七世有貴公配姚孺人

州志姚氏查有貴妻二十六寡茹苦矢志撫嗣子爲後現年五

十三

十七世慶成公配祝孺人

州志祝氏查有毅妻鴻文女二十九寡依父母守志父兄遠遊  
力撫兄之子成立性端嚴言動有禮法現年五十九

十七世禮言公配陳孺人

州志陳氏查有恭妻庠生鵬萬女二十四寡苦節自矢現年四

十二



十七世葵軒公繼配張孺人

州志張氏查有舊繼妻海鹽監生張英華女嘗割肱以療父疾

年二十九而寡撫前女如己出

女適同里庠生朱濟川感撫育之恩捐田叁畝增入節孝祠

十七世生三公配朱孺人

州志朱氏查有伸妻監生鶴女乾隆癸丑有伸卒氏投河以殉

以節烈旌

十七世漢多公配陳孺人

州志陳氏查彬妻四川溫江縣典史徐女年十八歸查事舅姑

以孝稱年餘彬卒氏服滿死嘉慶年事



十七世守白公配朱孺人

州志朱氏查晉妻年二十五夫亡越二日殉道光二十二年正月初七日

十七世有德公配張孺人

州志張氏查有德妻達明女二十七寡卒年六十一

十七世有恆公配周孺人

有恆公配周孺人三十而寡守節撫孤現年六十八

十七世榮藩公配張孺人

庠生榮藩公諱師蓮配張孺人於二十九歲守節孤甫二齡撫



之成立卒年八十一

十七世有福配黃孺人

有福室黃氏咸豐辛酉十一月初五日粵匪至抱子人烈赴河  
殉節

十七世尊三公配朱孺人

尊三公諱有達配朱孺人年十八夫故守節五十二年而卒

十七世有年聘室朱烈女

有年聘朱某女咸豐辛酉十一月初五日粵匪至赴河殉節

十七世果亭公配施孺人



果亭公諱有澹邑庠生配施孺人年三十守節撫子人驥成立  
卒年六十一

十七世有滄公配董孺人

有滄公配董孺人二十四寡遺孤僅數月撫之成立守節四十  
一年而卒

十七世開三公繼配馮孺人

開三公諱有孚繼配馮孺人於三十歲守節

十七世舜和公配張孺人

舜和公諱有壺配張孺人二十九守節卒年六十



卷五  
四九  
十七世肇庭公配金孺人

肇庭公諱有發配金孺人二十四守節迄今已五十年

十七世福壽公聘錢烈女

福壽公諱有富聘錢某女咸豐辛酉十一月寇至被戕

十七世得三公繼配沈孺人

得三公諱有璠繼配沈孺人年二十八而寡撫育遺孤守節已

三十八年

十七世有道公配周孺人

有道公配周孺人年二十二守節



十七世瑞生公繼配吳孺人

瑞生公諱有祥配吳孺人年三十守節撫孤成立現年六十五  
十七世集堂公配祝孺人

集堂公諱有輯配祝孺人年二十六寡遺孤甫二齡撫之成立  
守節四十八年

十七世政元公配盛孺人

政元公諱有裕配盛孺人二十二寡守節已五十年  
十七世小山公側室及孺人

小山公諱有圻側室及孺人於二十八歲守節卒年六十三



慈妣顧太孺人  
生妣朱太宜人  
雙節述略

元復

於乎吾生母朱太宜人暨慈母顧太孺人見背二十餘年矣罔極之恩未報萬一尚復何言顧以不肖無狀忍使母氏劬勞與世俱泯將負疚滋深此和淚濡筆而不容自己者也

元復生三

月而孤實賴嫡母朱太宜人暨兩母撫育恩勤閱鬻以底於成先是胞兄雍伯早世先大父佩雲公高年在堂盼孫綦切先君慕松公亦年已逾艾似續尚虛懼無以副老人心先娶顧慈母祇產一姊適同里庠生王賡元後從嫡母請更娶生母逾年舉不肖先大父抱孫之願藉以稍慰疇料命蹇祚薄生纔三月先君卽捐館



舍時嫡母春秋已高慈母年甫二十一生母年僅二十熒熒門  
內上有白頭之翁下撫黃口之兒仰事俯育飲藜茹荼殆有不  
忍追想者且不肖少多疾病每一呻吟必環聚而泣籲天默禱  
故鞠育之勞倍焉近年當幼學延師課讀適連遭大祲則嗇衣  
食以佐脩脯長爲授室二十年中嫡母偕兩母心力交瘁歲已  
酉不肖舉長子文清庚戌八郡庠王子又舉次子文榮至此始  
破顏而笑然回念嫡母已沒不獲見則又黯然悲蓋畢生無懽  
愉日也兩母事嫡母甚謹病侍湯藥恆累月不稍懈與戚屬和  
而敬御臧獲寬而肅至持家勤儉則又素性然也苦節三十餘



年已卯歲不肖始克詳敘穆行得旌於朝如例特念不肖讀書未能成名無以博生前一日歡今墓木已拱不復稍有撰述以示後之子孫則不肖之罪終無可贖也會族有續葺宗譜之舉謹述梗概以獻 諸尊長采列焉

十八世情田公配馬孺人

州志馬氏附貢查奉璋妻職員如楷女年三十奉璋應試北闈卒於邸舍翁姑年邁氏竭力侍奉家雖貧而甘旨無或缺遺孤鴻達僅八齡教之遊庠守節二十年

十八世拱辰公繼配徐孺人



州志徐氏監生查人魁繼妻監生淦長女銅梁知縣瀛從女也  
年二十九適查十閱月而寡力撫前出子女均有恩現年四十  
五

十八世則平公側室林孺人

則平公諱普側室林孺人於二十六歲守節

十八世復會公配吳孺人

復會公諱人驥配吳孺人年二十八守節

十八世人馥公配鍾孺人

人馥公配鍾孺人二十六守節撫遺腹子濟明成立

十八世青華公側室蔣孺人暨薛孺人

青華公諱人洪側室蔣孺人二十歲守節又薛孺人十九歲守節共勵冰操者已三十一年於光緒庚辰題 旌雙節

十八世冲泉公側室張孺人

冲泉公諱人淵側室張孺人年十七寡守節已四十二年



十九世坤發公配蔡孺人

坤發公諱濟賡配蔡孺人年二十四寡遺孤僅三月撫之成立  
守節已二十九年

十九世友蓮公側室宋孺人

友蓮公諱沛側室宋孺人於十七歲守節卒年三十一

十二世文來公配楊孺人

州志楊氏查嗣錦妻守節撫孤

十二世嗣琛公側室王孺人

州志王氏查嗣琛妾以節壽終



海寧查氏族譜卷六

外傳二

七世文學五三公次女何烈婦

浙江通志何爲忠妻查氏覺菴存稿何烈婦者我伯兄五三先生之仲女歸庠士何爲忠女性聰慧通孝經內則諸篇士子海上寇作猖甚里中人四散奔突爲忠具舟同婦行舟次楊廟之西風起不得進婦曰黑夜倉皇去將安之彼鬱鬱隆隆者吾祖吾父墓地是吾死所舟中人環守之乃給爲忠登岸取火守者懈卽自溺水中以死水故積淤溷濁五日獲其屍屍所忽有清



泉流出澄澈可鑑面瑩如生鞋襪尚鮮完焉比葬有白鳥盤舞  
其墓樹里人咸神異之近川子曰吾傳烈婦事重簌簌垂淚焉  
夫死非難處死難耳方倭夷發難六七年間死者何限丁壯殲  
鋒刃死者老弱婦女纍係罹逼辱死者挈家踰垣墮坑谷死者  
羸軍潰卒裹瘡凍餒死者厲氣鬱蒸嬰疾疫死者偏裨失律身  
關三木死者主帥擁兵不戰檻車就戮死于市者豈無鬚眉丈  
夫紈綺貴介今皆塵沙斷梗同爲臭腐而烈婦之死凜凜如生  
冽泉地涌皓羽天翔可倖致耶是故爲子死父爲臣死君諫者  
死言官者死職有民社者死城郭爲將帥者死方國誠使人人



善處其死禮義金湯萬世之固矣夫然旌忠表烈錄死勸生關繫國脈民生甚重爲論著之

七世刑部郎中九一公長女董節婦

太和譜世系小傳書女二長適廩生董一陽敬修譜小傳書長女適董一陽以節旌

八世都事友峯公女陳節孝

啓佑要錄我五世祖姑爲雷臺公之女而側室顧太君出也幼嫻女訓歸陳公祖舜子女學之駿德言容工一時稱大家模範旣蚤失所天矢節撫孤凜然冰蘖雷臺公春秋高自歸甯外饋



問無虛月於顧太君歿後則追悼所生孝思彌篤爲卜兆于塢莊村去畱臺公之墓二里而近凡捐田四十餘畝爲祭產故至今春秋祇謁畱臺公墓卒事亦退而至塢庄村薦享以無忘祖姑之孝云

九世副貢日葵公第四女朱孝婦

主善齋文鈔日葵公諱允愷第四女歸明經朱完初而旌德令朝瑛之母也完初母祝繼母徐事之不以存亡前後異隔垣聞姑足音輒鬢然拱立常躬機杼澣洗佐甘旨隆薦享焉徐姑遺三女未嫁則罄筐篋簪珥嫁之完初年三十未有子爲置側室



生子琦不數月遂舉瑛視之如學子其所以教者時時取書傳及諸故老談說可懲勸者揚厲之

日葵公第五女居節婦

主善齋女鈔日葵公第五女適苑馬卿居守之子翰隆年二十一而寡守節三十餘年年五十二而卒子鴻基不識父面倚母爲父爲師節婦訓以祖德復簡先世遺書嚴飭之鴻基有聲士林學博聞自寅爲請旌按翰隆仲兄翼隆死姣鹿門坤女茅氏自經以殉節烈出于一門一時稱爲盛事



九世文學仍素公女許節婦

主善齋文鈔仍素公諱允授女適許丕初幼通女學諸書性純  
孝母病籲天請代刺臂肉和羹進而母病良已比嫁事舅姑如  
父母潔滌澆治箴紉略無缺節丕初以篤學數奇歿婦年二十  
七念不獨生以尺練矢殉父母力持之勗以殉死易育孤難乃  
止時長子甫五歲幼子尚在孕扃樓獨處足不踰閫教遺孤嚴  
不爲煦煦姑息延師篤課每辭塾入更親自程讀篝燈紡績與  
相對午夜方休蓋以婦兼子職母兼父道者凡十有八年如一  
日年四十四卒明旌德令朱朝瑛志其墓詳見靈泉許氏譜



十世文學二奇公女朱節婦

主善齋文鈔予觀近修朱先生述其叔母查孺人懿行而知二奇公之有賢女也其略曰孀少失母母族焉依外王父母母病刲股上肉藥之性至孝也年十七歸先叔孝事姑嫜王父母樂就孀饒天啓七年余遭大故又極貧叔及孀更憐而子予凍而裘餒而粒遊學膏火悉資之崇正十一年叔見背予時稍自振死葬叔亦迎孀而母之後值世變予避亂山中會家破孀攜予妻子間關來從遇予于四明明年丙戌予復棄家走天台孀被盜不能旅活仍同妻子北渡奔涉千里備諸顛連裁于義卒無怨



卷六  
四  
婦少讀書垂老不釋卷臨事識大體能持門戶又工綜核盪米  
碎事故治家小大中節雖處變不改其度喜予與四方賢士遊  
客至講道論文隱屏間竊聽爲具食必客留久也然後快又樂  
拯貧乏施而不責報宗族親戚隣里無不高婦諡云近修叔名  
履穆字叔純庠生一子殤近修後葬叔母而銘之詞曰子無  
母有叔母母無子有猶子子母相從于少壯及老歷于患難生  
死數語不具足感人與

十世贈通議大夫公度公女朱烈婦

主善齋文鈔公度公諱大緯女適明經朱朝琮方水乙酉丙戌



間兵火之變未息所在縱橫劫殺方水去家獨行及于害而烈婦遂誓以死殉子奇齡甫十歲越十有九年始克合葬之謁于族祖近修先生爲文以誌之其稱方水之配曰查孺人名儒公度公女稱余叔母爲再從姊閨秀也有林下風公度公居橫漲橋叔母嘗謂予曰橫漲橋妹不數見卽見旋旋相依言動法予手卷畫不暫釋素衣闌珊終不施珠翠服炫服明于經史大義至性有過人者迨稱未亡人叔母曰妹必死矣已而果然相去僅百日

十世學博子宣公女沈節婦



主善齋文鈔予大父學博公女惟沈姑母而性極莊靜未毀齒  
卽喪我前大母張太孺人每號涕悲思居常不輕言笑時觀女  
訓諸書及笄嬪于武原沈氏兩家方各鼎盛而姑父文三公年  
少績學康熙壬子選貢名噪詞場一切家政恃姑母爲賢助未  
幾文三公歿表兄生甫四歲姑母長號欲絕已而以上事尊章  
下撫藐孤爲已責強就饋粥盪而持戶內外肅然也表兄未冠  
補澤宮弟子後冀得祿養循例貤封姑母太安人而冰操柏節  
三十六年曾弗獲綽楔之榮我先妣年太孺人時亦太息及之  
云



查女石烈婦

浙江通志石天球妻查氏遇兵不屈被創死太平湖縣志

查女毛節婦

浙江通志毛鴻翰幼有癩疾足痿不能行妻查氏扶持左右之  
鴻翰歿氏守貞不二錢塘毛氏五節查其一云本杭州府志

按右烈節查女二莫得其所生世次矣姑以其時序列  
此俟再考

十一世贈中翰方穀公女董節婦

勉耘文鈔嗟嗟予姊之寡也年祇二十二歲計歸于吾姊丈敏



公甫三載耳不幸敏公死又不幸無子又不幸生一女而天上  
有老翁予姊養之繼甥光萃予姊撫之前配陸氏有遺女予姊  
鞠育之甥娶婦李氏姊同操家政不辭勞苦年八十有四而死  
終身未嘗有愠色有喜色也康熙甲午冬甥以書來云將請旌  
予復云姑俟他年予姊大節自不泯泯也而今已矣哀哉予實  
負予姊而吾甥先姊而逝且負予甥熒熒孤孫朝夕不暇無力  
以上聞明矣雖然吾姊大節終不泯泯汶汶也前邑侯陳公天  
銓給扁曰節孝維風予略其行實以俟後世焉嗟嗟

十一世二求公女孫節婦



浙江通志錢塘孫之騮妻查氏年二十三而寡當于歸時夫已患瘵疾氏茹素禱天願以身代又先撫煙堂爲子夫卒堂始週歲氏鞠育教誨俾至成立事孀姑甚孝守節三十年按節婦係北支二求公諱繼再次女其生母陸氏苦節堅貞歷五十餘年亦例合旌表又錢塘縣志載查氏貢生孫之騮妻榜眼查嗣韓女不知實榜眼之從妹也又其撫子名基未知孰是

查女吳節婦

浙江通志吳天菴妻查氏年二十夫亡家貧柩停破屋中氏朝夕紡績爲營葬計每遇風雨輒撫棺哀號閱二十年始得購地



畢葬以積勞成疾卒時年四十九親叔無子立從姪仲升爲後

按節婦未詳所自出

十一世宏敷公女胡節婦

主善齋文鈔宏敷公諱泓繼女適胡永禧年二十八夫亡事姑撫子營葬兩世力貧守志苦節四十年子在田有聲庠序上其事于有司得題旌焉

十一世文學西莓公女淑英

濟陽家乘補西莓公諱奕繼女字淑英名惜揚州司李馬公麟翔之介婦大學思贊之配也幼聰慧有詠絮才年十七歸于馬



家有道古樓藏書最富因縱覽唐宋以來詩文深閨唱和以清  
雅爲宗不作纖縵語所著吟香集六卷祝柔嘉序之云足附卷  
耳葛覃風天下而傳後世太學爲付之梓焉

十二世贈通奉大夫石丈公女陳孺人

浙江通志陳恂求妻查氏年二十九而寡事翁姑孝姑病侍湯  
藥者二十餘年撫教子女有成守節四十餘載康熙四十四年  
具題奉 旨建坊旌表

十二世禹推公女陳節婦

榮古堂文集節婦姓查氏系出予五世伯祖刑部尙書郎九一



公之後從伯父明經孟耀公孫女而先兄禹推長女也性端重  
寡言笑孝父母勤女工年十一喪父哀毀如成人予外舅祖懷  
陳公聞而賢之以禮聘爲仲氏和光名玉世配康熙辛亥年二  
十歸于陳時姑朱孺人已先逝節婦事翁惟謹戊午二月予爲  
館甥與和光把臂論文情同手足和光少余一歲事咕嗶不稍  
間染瘵疾其冬卽下世節婦與和光同率凡八年至是覓死者  
數次悉獲拯乃強視息撫四歲孤恩勤教誨以期于成而中人  
之產數十畝食淡衣粗謂義命固然也壬辰年六十一而歿其  
子幼序無力請旌恐湮沒不彰號涕而乞予一言嗚呼節婦于



予雖舅嫂實叔姪也故相見仍叔予其節行予夙知之遂不辭而爲之傳

十二世文學怡曠公女朱節婦

浙江通志朱濟任妻查氏在室時母老且病氏決志侍奉不適人及母歿服闋始受聘歸朱爲繼室年已二十六矣甫百日夫亡前室楊遺一子二女撫如已出教子廷彬能讀父書爲邑諸生女亦有歸娣李亦早孀氏勉以大義同勵冰操守節二十二  
年卒

十二世修令公女湯節婦



主善齋文鈔族兄修令女適海鹽湯正希年三十夫亡無子茹  
苦獨守完節四十五年壽七十有五

十二世子庸公女陳節婦

主善齋文鈔族兄子庸諱嗣惇女適陳穎世年二十四夫故守  
志撫女苦節四十餘年

十二世明經律齋公女許節婦

公舉節孝傳略查氏許璠妻幼喪母及長父授以內則禮教遂  
嫻事後母無間言年十七歸許舅已早逝事姑孀克謹澣澣三  
年夫物哀號幾絕訓子嚴有過輒痛責之守節三十九年



十一世學博曾三公女陳節婦

公舉節孝傳略查氏陳禹謨妻年十九歸陳結褵匝歲而夫故逾兩載遺孤復殤事舅姑盡孝嘗置產十畝形家謂可營葬氏灑涕曰罔極深恩無由可報乃捐地葬其父母有一弟生而瘖氏終其身養于家

十二世文學芝田公女胡節婦

啓佑要錄胡節婦者文學芝田公之次女霍邱令二南公之孫女也自幼婉婉嫻內則禮年二十二歸于胡事孀姑以孝聞夫杏園公病歿既無子又無繼可立節婦單持門戶歷守已三十



八年今庚辰秋七月四日七袞稱觴族黨爲祝嘏其言盡擬之  
霜筠雪柏無愧云

十二世舜玉公女祝節婦

主善齋女鈔族兄舜玉次女歸祝宗琳爲繼室年二十三宗琳  
歿琳前妻子咸澄先已病廢姪女方有娠銜哀茹痛絕而復甦  
者再長媳周氏泣慰曰姑遺腹幸生男則先祀可延也因泣而  
頷之次年咸章生又次年咸澄切兩世孀閨屬在藐孤撫之長  
兼教之以有成年十七補邑諸生爲納婦及咸章生子懋振命  
立爲咸澄後而於乾隆十五年題旌周氏薦紳先生莫不高查



女節行爲詩文以紀之

十二世補思公長女葛節婦第二女陳節婦

主善齋文鈔族兄補思長女適庠生葛克思早寡守志事舅姑孝喪葬盡禮以節壽終乾隆五年題旌又次女歸陳無逸年二十餘薨居撫其三子俱得成立讀書娶婦心力爲瘁現年六十有三

十二世乾元公女王節婦

公舉節孝傳略查氏王鉞妻年二十三寡撫二歲孤惟槐成立紡織自給營葬遺棺守節三十二年



十二世進可公女吳節婦

主善齋文鈔族兄進可諱嗣正壁洎公後居省城其女適錢塘  
庠生吳嗣韓青年矢志守節撫孤白首完貞事符典列于乾隆  
年建坊旌表

十二世雨田公長女馬節婦

主善齋文鈔余弟雨田長女適同里馬孝廉克俊之子聲純聲  
純故孤露當結褵時其生母馮亦復衰病一切井臼門庭惟新  
婦是賴姪女勤敏性成言動有則逾年舉一女不育而聲純又  
暴病以歿姪女痛不欲生念門無期功近屬願且代子職終事



老姑姑以哭子故尋殞經理兩卷悉隻身一力承之自此二十  
年來揮涕飲泪無虛日且益不廢操作蠶簞蠶績匪止爲身謀  
衣麤食淡齋縮者久之乃得負土葬翁及先後姑以聲純耐焉  
而築己生壙于其側馬之族議爲立嗣子則曰五世旣親盡必  
擇賢乃可凡諸大事雖男子識力無以過然竟勞瘁成疾至咯  
血失聲予憫之書以慰其志其稱未亡人也年甫二十三云



查女俞節婦

公舉節孝傳略查氏俞幹臣妻幹臣業儒疎于生計氏隨勉有  
無年二十九獲居絕粒幾死三子幼舅姑亦尋歿拮据喪葬  
子長就塾歸必叩其所業篝燈課讀比病置藥弗進曰吾前不  
卽死者以親老子幼耳遂卒年六十

查女賈節婦

公舉節孝傳略查氏賈元霖妻年二十六寡事舅姑撫幼子守  
節三十八年

查女許節婦



公舉節孝傳略查氏庠生許鵬妻性恬澹而勤日夕躬紡紝夫病歿氏年僅二十七絕粒三日幾死遺腹生男不育諸叔尚幼比長生子始獲擇嗣事父母舅姑咸盡孝性好施見貧者必減日用周之守節三十一年

查丈胡節婦

公舉節孝傳略查氏胡子瞻妻年二十一夫亡時舅姑已早世而氏方娠明年育男終苦單隻遂歸母宅與寡母共操作者三十三載

查女賈節婦



公舉節孝傳略查氏賈遇泰繼妻年二十五寡事舅姑盡婦道  
前妻遺子女各一撫之成立婚嫁無愆期父歿無嗣迎養其母  
守節三十三年

查女顧節婦

公舉節孝傳略查氏顧德正妻德正家式微氏食貧無怨躬操  
井臼以養孀姑德正幼氏年二十八子生纔一期愛養成立守  
節三十七年

查女徐節婦

公舉節孝傳略查氏徐絲綸妻年二十七寡翁姑衰年多病遺



孤竝髻齒氏仰事俯育備嘗辛苦守節三十年

查女曹節婦

公舉節孝傳略查氏曹其讓妻年二十九寡事舅姑撫遺孤有  
光有成成立守節三十一年

查女陳節婦

公舉節孝傳略查氏陳升文妻年二十七夫亡舅姑尋歿營葬  
兩世歲飢茹荼自甘卻賑米勿受守節三十年

右查女九所生世次未詳

查女顧節婦



錢塘縣志查氏顧懋樊妻

查女吳節婦

海鹽縣續圖經查氏歸吳鳴環之子八月而夫亡氏哀慟幾絕誓無二心撫姪爲子四十年氏卒後嗣子亦卒遂無人爲請旌者

查女董節婦

董氏譜夫嗣昌以孝死氏年二十五撫孤守節

右查女三亦未詳其世次

十三世貢士存叔公女朱節婦



公舉節孝傳略查氏朱世泰妻康熙戊辰榜眼嗣韓女孫候選  
訓導克誠女也性至孝在室時母病潛割臂肉爲糜以進母疾  
遂瘳年二十九寡事邁翁盡生養死葬禮遺孤家瑜家璜延師  
訓迪祖業賴以不墜守節三十年

十三世太學生坤元公第三女顧節婦

主善齋文鈔坤元名克承女適進士顧周子五枝年二十七而  
寡屏去華飾誓不渝志撫孤駿文成立現守二十餘年

十三世位東公女朱節婦

公舉節孝傳略查氏庠生朱黃矢妻查雲標孫女位東之女也



卷六  
夫勤學成勞而死氏不欲生翁李桂再四勸諭自是足不下樓  
撫姪鉉爲嗣守節已三十年克盡婦道鄉黨咸稱

十三世別駕桐山公第四女陳節婦

主善齋女鈔桐山名覽女歸編修陳世仁幼子球年十九卽稱  
未亡人抱姪用敷爲子苦節食貧葬生姑及夫能如禮課子成  
立用敷以己卯庚辰聯捷登第授官部曹歷守已二十餘年

十三世國學熙甫公女朱節婦

公舉節孝傳略查氏庠生朱經邦妻年二十寡無子撫字幼叔  
成立待繼守節二十六年



十三世文學東升公長女朱節婦

公舉節孝傳畧查氏歸朱禮端甫三載而寡遺孤纔一歲又側室子一竝撫之已出者年十七而殤庶子成立讀書婚娶視若己出守節已二十餘年

十三世汝長公女徐節婦

州志徐集三妻查氏克偉妻節婦朱氏女也二十四寡以節自勵者五十餘年

十三世官元公女沈節婦

州志沈瞻蓼繼妻查氏官元女二十二寡撫孤幼殤苦節五十



五年嘉慶元年旌

十三世耿吾公次女朱節婦

州志監生朱宇忠妻查氏克式次女撫孤守節

十三世耿吾公季女吳節婦

州志庠生吳尹耕妻查氏克式季女矢志守節

十三世景卿公女

州志查貞女庠生翔鶴女俞貫吾聘室未婚貫吾卒女年十八有欲爲別議者女投繯已氣絕侍婢驚救得甦父母乃許其赴俞守制時姑老且病敬謹侍奉者四載撫嗣子成立卑匱資百



金爲謀生計卒年四十五乾隆庚子四月二十八日歸俞氏垢容素服終不見齒

十三世禹服公女

州志玉間外史查昌鵠阜甯巡檢克纘女年十九嫁陳咸備三十六寡幼從族兄岐昌受小學女訓四子書通曉大義及咸備沒事舅姑撫幼子搢拄數十年備極辛苦晚歲失明而持家益嚴女尼巫媪無踵門者并戒其子敬璋云我死後勿作佛事年七十敬璋請爲壽堅止之乃乞無錫秦侍郎爲撰生傳并列行述刻入杭州府學節孝題名碑所撰著詳藝文十六



十三世樸齋公季女馮節婦

師竹庵稿宗長樸齋公季女生三齡喪母顧孺人賴伯度母許氏撫育以長年十九歸同里馮壽生彌月後夫爲負米計出門數月病而歸百計瘳之卒不起蓋結褵未週歲也事邁姑以壽終辛酉寇擾里門境至不堪顛顛以死苦節三十載嗟乎爲釐婦已不幸矣至生失所恃嫁失所天而又躬丁世難致不永其年可謂極荼蘼之尤者已



十四世校書遠亭公第三女陳節婦

主善齋文鈔遠亭名廣女適太學生陳濟生自二十二歲孀居歷守已三十七年毀容子影待繼請旌

十四世文學來鳳公女陳節婦

公舉節孝傳畧查氏陳大經妻年十九夫亡投繯仰溷竝以救免乃忍死以事老姑無子撫姪姪傳爲嗣守節二十七年

十四世文學文言公女蘓節婦

巖門文集族兄文言副貢可亭公子世居省城其次女乳名小法年二十一歸錢塘蘇隲結褵僅月餘夫亡家貧苦節誓以不



二繼夫兄萃次子槐爲嗣

十四世東槐公女陳節婦

公舉節孝傳略查氏太學生陳治初妻結褵五載而夫故陳固累世未葬氏舉五世二十餘棺皆安窆窆遺嫁時有奩田二畝臨歿仍歸其弟以奉父祀守節

年

十四世亨嘉公女許節婦

州志許韶妻查氏昌會女韶客潁州乾隆庚寅奔父母喪至滁州烏衣鎮墜水死氏苦節十餘年卒

十四世乾中公女鄔節婦



州志鄔丙侯妻查氏監生深女撫孤成立以節稱

十四世隨軒公女張節婦

州志張燾妻查氏名映玉庠生汝本女灤州知州揆之妹也年二十歸張燾婉婉能事其姑姑素嚴然以婦賢篤愛之二十四寡有一女旋殤無期功親推及服盡繼一子秉直又殤與其姑日夜哭念姑老斥其產以營葬其夫并爲姑生壙期他日以已祔焉燾篋藏其父景筠手輯家世譜系嘉慶戊寅氏年四十二貧且病寄書其兄於宣城曰自我之夫夫之父祖皆早世我祖姑及姑以苦節聞今以逮我蓋三世矣我夫又無子我懼先世



之澤由我而遂泯也我爲記其名字與其墳墓之所在他日有嗣我者而告之焉其兄悲其言爲作張氏三世節婦傳其後二十五年查氏卒年六十七查氏工詩有梅花書屋詩稿夫亡盡焚之

十四世傳初公次女金節婦

州志會稽監生長蘆議叙州同金桂妻查氏曹舉同知鳴昌次女名毓秀少孀守節撫孤成立

十四世以蕃公女顧節婦

州志顧根仁妻查氏監生以蕃女二十五寡事翁姑二十餘年



以孝聞止一女撫夫弟之子爲嗣

十四世思周公女

州志查貞女節婦黃氏女也父昌斌許字於朱未及笄而朱氏子夭女矢志守貞悲泣數載成嘔血疾而死

十四世麗生公女許節婦

麗生公諱昌淦女適同里許渭東咸豐辛酉遇寇赴河殉節

十四世洪範公女顧節婦

州志監生顧惠傳繼妻查氏昌遠女婚八月寡誓節四十餘年



十五世心泉公女馮節婦

州志馮悅忠妻查氏奕鑾女早寡苦節待嗣

十五世梅史公女

州志查貞女行二名端杼灤州知州揆女性靜敏讀書工詩年十四侍母病極勞瘁居喪幾毀字常熟蘓某得凶耗矢志不二越十年歸於蘓事姑孝姑愛之若女家事都付之理婢秀環感女之惠誓不嫁將依女以終年逾三十猶若垂髫之戀母也道光庚子貞女族人河南知縣人漢撰二姑傳附著秀環之事有

刊



十六世元培公女張節婦

州志張士周妻查氏世敦女舉人傅蓉姊也二十九寡無子族無可繼家赤貧藉女紅以奉姑比歿鬻釵珥治歛具歲饑嘗絕炊父憐之命弟迎歸遭父及繼母喪以孝聞弟游粵西其子人鵬甫五齡失母氏爲之教育以成現年七十四

十六世元培公女祝節婦

州志庠生祝志立妻查氏世敦女張士周妻節婦查氏之妹年二十四適祝越四載而贅子甫二齡刻苦撫之稍長課讀不倦卒年四十



十六世月珊公女朱節婦

師竹庵稿堂兄世濼嫡女兄挈眷遊幕江甯時患喘症女侍湯藥  
祔父病危潛向暗室籲天割股和藥以進獲痊其父母初不知也  
後於伏天露創痕窮詰之不得秘女歸慈谿教諭朱葆榮次子士銘



州志查女羊節婦

州志羊相周妻查氏二十四寡二子一女均幼教育婚嫁年七十二卒孫行林立

查女俞節婦

州志俞天球妻查氏守節旌表

查女朱節婦

州志朱始然妻查氏守節旌表

查女祝節婦

州志祝維綱妻查氏守節



查女胡節婦

州志胡秉元妻查氏年二十三適胡甫五載寡姑性嚴急氏以紡織所入竭力侍奉家雖貧甘旨無缺也姑歿經理喪祭盡禮撫嗣子經濟長爲納婦守節四十餘年

查女祝節婦

州志庠生祝翼望妻查氏二十七寡矢志殉身閑之不得遂坐卧一室三十餘年如一日內外羣從敬如嚴母卒年六十三

查女賈節婦

州志賈文謨妻查氏年少矢志撫二孤成立



查女范節婦

州志范文熙妻查氏二十四寡謹事翁姑力撫遺孤

查女范節婦

州志范作麒妻查氏二十五寡力事翁姑并營葬喪撫嗣子成立既授室而子婦俱夭疊遭坎慟里黨哀之

查烈女

州志查烈女許字庠生祝天錫將議婚天錫患痘甚危或言天錫已死女聞之卽絕粒至中夜投環而逝未幾天錫亦卒祝氏乃迎其喪歸遂合葬焉周氏廣業悲天錫負才夭折又以烈女



事若不與旌格而其志視他殉死者更苦弔之以詩曰悲哉行  
詳見甯志餘聞周氏廣業蓬廬文鈔有文學祝禹範暨配查烈  
女傳

右查女十所生世次未詳

十世處士千峯公女朱節婦

州志查氏朱大京妻甫成婚卽喪姑服闋夫又死時氏年二十  
有四無子僅一女撫猶子爲子守節三十四年

世 公女金節婦

州志查氏金虹樞妻在室時母臥病十餘年氏自効奉事惟謹



久而不怠歸虹樞未三載而寡翁姑年邁遺孤甫及碎氏茹苦支持守節二十八年

十世純庵公女沈節婦

州志海鹽選貢沈文三妻查氏烏程教諭煊女幼嘗觀女訓諸書嫁未幾寡子甫四齡事尊章撫藐孤內外肅然守節三十六年

十二世左旋公女

州志查樞女字吳有收康熙乙未有收卒女矢志守貞撫嗣子正續



查女許節婦

州志舉人許和鈞妻查氏庠生贈刑部員外郎焜女年三十寡  
遺孤雲鴻師濂俱幼親授詩書長則延師課讀而母教不少寬  
二子早歲游庠家故貧脫簪銀購地營墓翁姑與其夫守節三  
十一年

查女賈節婦

州志賈實樸妻查氏驥良女二十四寡家極貧乏備閱艱辛撫  
二孤成立卒年七十五

查女朱節婦



州志朱承垣妻查氏璇中女二十三寡止一女奉祖姑及孀姑  
以孝力蠶繅勤紡織守節三十年

查女許節婦

州志許鴻妻查氏培風女撫遺腹子應奎苦節終身



海寧查氏族譜卷七

誌狀

古者葬有豐碑木爲之漢以後改用石乃刻死者爵里  
勲名於上碑誌由此寔盛而表阡銘隧之文又必狀述  
先焉凡以期不朽乎先人者率多名公鉅儒手筆所幸  
久而未盡缺逸共得如干篇視曩時諸譜增加十之六  
七因卷分上下云

山東叅議東谷查公墓誌銘

楊旦

正德五年正月十有七日子同年山東少叅查文顯以王事卒



于京春秋五十有六其孤堅卜以冬十二月十五日祔葬先刑部府君墓次其再從姪秋官原博爲之狀俾來請銘予時提學於浙諒無容辭按狀公諱煥字文顯別號東谷其先新安休寧人高祖仁齋先生徙居海寧之園花因家焉伯祖仲容洪武初侍藥禁庭充太醫院使有功高廟大父貧樂翁父橘泉翁咸懋陰積循循養晦橘泉配李氏生二子公其長君也幼聰慧爲大父所鍾愛因命公補邑庠弟子員公于書不數過輒諳大義臨文時出新意一時奪諸上座雄聲江南成化庚子領鄉薦第宏治庚戌進士初授南京刑部主事以儒術飾吏事不爲淡文與



修大 會典允諧三載考績馳封橘泉如其官母李氏爲安人  
宏治戊午內艱服除轉北刑部員外奉詔出封襄藩例諸王乍  
之國餽遺餞送悉從厚使者可以不貧公獨謝一切不取物論  
高之贈公詩有由來使者清如玉不帶飛塵半點回之句壬戌  
陞河南僉事撫按以其才檄治大梁劇道風紀大振名動公卿  
間交欲薦公持憲限以資格不果甲子秋外艱起家改山東僉  
事其治如河南戊辰值曹州賊變鎮巡簡公往治之不動聲色  
尋已馴帖已巳陞本省叅議督運上京跋涉風沙投擲艱重服  
體日羸浸成瘵病數月不起嗚呼公以一介書生策名天府問



刑兩京爲名法家游宦兩省爲良方面志業駸駸欲與古人齊  
乃以方剛之年當多故之日王事驅馳守道傾逝可悲也已公  
娶許氏封安人生男不育續娶側室袁氏生子堅娶朱氏爲邑  
庠生封氏生基聘沈氏又次袁氏生表聘祝氏女四其三已適  
人一女尚幼在室公平生脫略不羈致謹于大節其事父母咸  
得懽心養生送死一切自致睦于弟祖業馨所欲與之叔母王  
守節清公爲上聞獲旌表冥姑貧無歸迎養于家數十年處鄉  
黨和易任真不設鉤鉅其立心制行自筮仕至易簪始終不渝  
古所謂金玉君子公其庶乎是宜述而銘之銘曰



學積行成斂繁就簡威儀棣棣宅心坦坦輝煌金紫職非不顯  
周流藩臬志非不展麟鳳德衰龍蛇運蹇壽不滿德孰不嗟惋  
天祐後人庶以勸善

明故贈宐人先妣曹氏墓誌

男約

正德庚辰秋九月伯兄雪坡以家督治父喪襄事戒期矣念先  
妣宐人壙石久未有誌者乃次敘姓系梗槩命約爲之嗟乎宐  
人歿後六越月不肖始生今四十有九且賴遺澤以文字進者  
誌之缺誰之責耶謹按宐人姓曹氏海寧舊族父諱珪母費氏  
以正統戊午正月初五日生爲次女自幼端淑以孝聞時從叔



致老而無子取宦人鞠爲己女移所以事親者事繼父繼父甚  
愛之爲擇所宦以配先君一愚遂館于家爲終養計繼父拙于  
治生門戶日衰宦人乃隨先君奉繼父誅茅小築于西水之涯  
卽伯兄所居之處也宦人躬炊爨勤織紝暇則蒔蔬果字雞豚  
如是者二十有餘年其間一錢一縷細入毫末務在節約而手  
自較量他如餅罍醢醢之屬魚肉蔬果之味客至立辦時或推  
其餘以應鄰里之求無少吝先是宦人之初生季父珙以其兄  
多女謂兄曰女多何益此可棄也毋使他日貽父母憂比長聞  
其言感激自勵雖貧足迹未嘗躡季父之門一日舅敬夫公疾



篤宐人歸省之族叔祖橘泉謂曰汝夫出贅祖業不得分毫棺木誰將爲之宐人應聲曰棺木我當力辦何計祖業有無初未嘗謀于先君也嘗自慮子少勸先君娶吾母孫氏爲側室恩意相孚曾無幾微見于顏面平生辛苦家業垂成方買屋材將事營建而宐人病矣病革謂吾母曰我雖有子甫七歲未知立否汝今有身善自愛護若得好子昌大查門吾願畢矣其苦心淑行類如此以成化壬辰四月初一日卒享年三十有五浮葬淺土卒後之九月吾母果生不肖約明年先君娶繼嫡母王氏後二十有九年繼母亦卒始奉遺骸與繼嫡母並葬于道人塘南



之新塋宐人生一男卽伯兄繪二女長姪次適里人許良繼母  
生男二縉縉吾母生縉暨不肖孫男秉中秉直秉成秉彞俱繪  
出秉銓秉鉞俱約出秉泓秉澈俱縉出秉倫秉信俱縉出凡十  
三人改葬後六年爲正德戊辰不肖以主事遇恩例蒙贈母氏  
俱安人又十年戊寅不肖以僉事考滿加贈母氏俱宐人嗚呼  
吾門自御醫伯高祖仲容謝世以來家世中落重惟宐人當衰  
薄之秋相吾先君竭力協助逮下以恩至有今日而存與歿皆  
有遺憾約又無所肖似不能顯揚萬分雖從士夫後命服命書  
寵褒再至然泉臺長夜孰與爲榮追慕號殞痛貫心骨敢錄梗



概刻而揜諸幽以記歲月如此昊天罔極痛可勝言哉

按此知曹宜人卒于忠齋始生之歲越三十年壬戌第  
進士歸丁王宜人憂誌云改葬後六年為正德戊辰則  
兩宜人並葬于道人塘南之新塋者宏治癸亥也又十  
七年己卯奉政公卒壽八十有六庚辰九月葬公而補  
撰宜人誌則必有誌公墓者矣惜其文失載今于忠齋  
集中得此篇乃獨存之至孫十三人名有遺譌或係傳  
寫之故姑仍其舊若我六世祖秉鈞又後此九年嘉靖  
戊子始生宜誌未之及也

### 處士雪坡查先生墓誌銘

萬潮

嘉靖戊子門人查秉彝有父之喪從其諸兄卜葬地道人塘兆  
上葬日是年冬閏十二月十有八日兆一日介其友二三同志  
匍匐請曰秉彝諸孤不肖不克蚤樹立顯孤之親即死有餘愧



惟堂封之事必得仁者之言以章潮風聞處士之賢重以二三  
子之義其何能辭按狀查氏自休寧遷海寧八世矣我國家賜  
官御醫五世矣有自稱一愚翁者封奉政大夫沒祠于鄉則處  
士之父也處士奉其母曹宜人繼母王宜人惟謹夢萱志號終  
身貞之讀書遇有得輒錄示諸弟裁患徭役則躬任之良貨賄  
田宅一毫不自專教子若孫以端履儉德母蹈于過年饑鄰人  
不能輸則代之輸且告之勿復爲官租累厥身鄉人爭訟有不  
願之官府而曲直惟處士之聽者屢賓鄉飲好學不勅認理坊  
私經史左右危如也晚尤留意數學所著有箕裘發微雪坡蕪



稿總若干卷配周氏稱賢內助能克子婦道子秉中秉直秉衡  
皆邑弟子員秉彛領乙酉鄉薦各敦士行孫志學志譽志高志  
文志宏志奇志隆志立駸駸然各向成立以方伯巖齋先生狀  
來且曰予惟有伯兄之造克至于今則其所以元宗啟後概可  
知矣處士名繪字原素銘曰

心爾心親爾親鄰爾鄰經爾隱行以敷遺後人

明故處士從弟子宏墓誌銘

兄約

予弟國子生子守於嘉靖四年乙酉冬爲其弟子宏治葬事命  
其幼孤姪欽以表弟賈汝弼狀來請銘按狀君諱基字子宏曾



大父宗漢大父庭圭封南京刑部主事父文顯山東少叅君有  
嫡母封安人許氏者有嗣弗育少叅公擇取舊家封氏生君秀  
穎爲少叅公所鍾愛嘗從宦讀書于河洛齊魯間多所聞見用  
是聰慧人咸以遠大期之無何少叅公卒于王事君扶櫬還家  
甫襄事適里中缺儲長欺君少懦以其名報之官君毅然曰吾  
父謝世吾兄在學吾在布衣義當往役遂出長賦稅從容處之  
不虧公不瘠人學雖廢而門戶如故舉皆出里人之望外其平  
居事所生母封氏得其歡心處伯兄子守及弟子仁雖異母無  
不和氣夜思蚤作鮮有敗事瞻蒲望杏治生惟勤父置田畝有



在遠鄉君每減數易之或謂當世守君曰此正所以世守也父  
有妾王氏年少無子君謀諸兄以禮遣嫁或謂其無遺命君曰  
吾恐其有遺累也審已量力防微杜漸事多類此人皆謂少叅  
公有子矣君娶沈氏子三人長卽欽次鑑其一在襁褓鑑乃側  
室某氏所出君生于宏治丁巳某月某日卒于嘉靖甲申某月  
某日享年二十有八卒之次年閏十二月初八庚申祔葬龍泉  
祖塋之次嗚呼吾叔少叅公起家進士歷官藩臬所至廉幹有  
聲詎意謨遠運促中道而止謂畱所餘者在君君又早世命矣  
夫乃揮淚而銘之銘曰



有善孔彰匪直天賦投艱不墜實惟先祐千里名駒孰窘其步  
天祐善人永錫後祚

都御史恣齋查公墓誌銘

豐熙

嘉靖九年正月二十有九日侯官獄囚迸逸福建左布政使查  
君集議御史臺方坐外次賊以斧向君君曰吾爲若白稍起遂  
遇害闔城駭動八都人士以君宦閩久無苛政而死之慘也率  
拊膺灑泣同官諸君哭之若親兄右布政使錢可容以君嗣不  
在侍身當之悉心殮殯豐其賻歸其喪左參政吳德翼有同  
門之誼授其事爲狀授予予憑棺道次哭之乃按狀爲序與銘



序曰君諱約字原博姓查氏五世祖均寶由休寧徙家海寧之  
園花里均寶生慧慧生浩浩生實爲君高曾祖實生益君考也  
以君貴封奉政大夫福建按察司僉事嫡母曹氏繼母王氏生  
母孫氏封贈皆宐人君有美質師事祝虛齋蔡憤菴戴雙湖爲  
舉子業宏治乙卯領鄉薦壬戌登進士丁壬宐人憂服闋授南  
京刑部福建司主事讞訊勤敬遇詔例馳恩其親考績過家生  
母孫卒守制起服補刑部廣東司尋陞員外郎進北京刑部貴  
州司郎中隨擢福建按察司僉事執法自勵分巡武平道謁李  
延平祠命有司修葺以贖罰銀置祭田租六十斛永安有烈婦



陳氏久遺旌典改觀音閣祀之南平陳氏子同張氏子嬉浮橋  
張墮溺其父誣陳擠之坐死君至霖雨連旬疑寃訊得釋之遂  
霽福清民林英無子妻妬將逐妾君聞之道路名至曉以禍福  
後育一男鄉老名之曰林查賜攝建寧道歲飢諭富民平糶曲  
爲賑助修復建陽頽垣廢堰除殃民隸卒數輩松溪有富民兄  
弟構訟糾結君謂必有樂其禍而利其有者嗾之一訊卽得窮  
治之兄弟轉睦興泉旱疫令屬出官帑病藥死殮釋滯獄民賴  
之入賀萬壽節歸省畱妻子侍養挈一僕之官再巡延平軍以  
乏餉欲爲亂乃爲之處給繩倡首數人未幾邵武軍效尤登城



相語欲犯君爲之主卽單車往諭之遂解散還福城軍作亂君時已陞山東按察副使出受檄道遇賊斃傷爰與同官議定其亂泣山東理驛傳有緒再入賀還聞奉政公計奔歸制終補江西副使鎮奄受詞誣一生員殺人君正色曰朝廷設按察司專理刑名公府不當與卽付君理之直焉陞福建布政司左叅政新建陽學宮給孤榮衣薪咸有績再期進左布政使民輸賦者不加羨遇事親裁吏胥拱手福與泉饑君命試吏者人粟遂足賑已丑歲朝宁黜陟欽賞君名首薦與燕與賞朝野稱榮人謂君資深當內遷詎意无妄之禍及焉恨哉數日邸報擢應天府



尹又進都察院右副都御史巡撫山東噫已矣賊旣得郡學作  
主列名宦祠民相與塑像特創懷愍祠祀之以妥精靈蓋代左  
轄宋孔瞻主其議云君明達而謹畏被勅命有尚加愍愍語因  
自號愍齋居官清白自奉儉素其與人簡易未有數數然者事  
父母無間言築新室依伯兄側曰異日可共老也母弟繼與其  
財賄以次子爲之後居鄉處族未嘗以富貴自異配鄔氏封安  
人賢而能相君之歿哭數日不絕聲饘粥弗御浣衣血水飲之  
殆盡而無怨懟意生子男二秉銓國子生秉鉞邑廩生爲弟後  
者女一適國子生祝繼

下闕



東川翁墓誌銘

姪秉彝

嘉靖乙未十二月吾季父東川翁卒歲己亥十一月念二日卜葬於道人塘北連枝新塋之次從我先叔父御史中丞大夫愷齋公兆翁兆左成先志云我查氏系出徽之休寧祖千十提領來官于海寧園花里六十七世祖仁齋仲容以醫翊聖躬有聲洪武間迨我曾大父孚菴大父一愚公實以儒亢宗諱益字汝謙性嗜古倜儻樹義以誌齋公貴封福建按察司僉事歿祠于鄉子五人淑以聖賢學長我雪坡府君曹宐人出次卽中丞公暨翁孫宐人出次南坡翁暨竹溪翁出王宐人中丞公於翁友



愛獨至翁亦幹敏能當中丞心中丞第進士歷中外官三十年  
好修不家食事事煩易細巨翁力身之以故中丞無內顧憂性  
復和易雖中丞貴無一毫驕蹇意態忤競于物扁其室曰退菴  
退一步眼前空闊如許些小計較強弱便落多事煩惱窠中嘗  
云婁師德唾面須于未唾時事力始煦紆于童豎婦女罔不得  
其心用是終身不識令宰然善心計鄉胥之巧歷者莫眩以情  
家日饒裕奉已節約如婁人不御紈綺配黃氏夫人無出中丞  
公日夜憂多方爲構妾之善男者且曰吾兒季也愿可後汝翁  
遂以中丞公子秉鉞子之娶褚氏甲午舉子鄉時中丞下世矣



每戒曰吾祖宗積德百年發于汝父汝父廉慎竟遭閔凶後將  
大起汝善受哉晚得子男秉鈞聘許氏側室沈氏出女二人幼  
在室孫男三人志道志遠志迪翁生成化十三年距卒享年五  
十有九嗚呼翁可謂恂恂周慎者非耶德美弗耀天不永年痛  
哉爨於翁爲從子翁實視爨猶子也忍無言以徵于後遂雪涕  
而銘之銘曰

有鬱者坐考君子宮於千萬年而同

京兆近川查公行狀

李春芳

公姓查諱秉爨字性甫近川其號也查本姬姓以封邑爲氏迄



於晉唐有侍中柏安陽令義祖柱國師詣南唐有尚書宋有龍  
圖閣待制代懋勛績稱著姓歷傳至始祖仁齋公自婺源遷樵  
李卜居海寧之園花里仁齋公生慧慧生浩浩生實實生益是  
爲公祖以子貴封南京刑部主事加封奉政大夫生五子繪約  
縉縉約官御史中丞縉縉皆隱德弗耀繪卽公父號雪坡  
生四子秉中秉直秉衡公最幼居季焉齟齬時卽慷慨有大志  
雪坡公奇之令從諸兄學讀書過目輒成誦爲文不屬草立就  
甫弱冠遊邑庠卽赫有聲譽乙酉領浙江鄉薦丙戌不第歸丁  
雪坡公憂尋丁母周恭人憂居喪哀毀骨立幾至滅性乙未服



闕赴試春官持衡者閱卷擬擢上第會卷末填注偶誤乃置之  
旋名見稱賞不已戊戌赴試北上家遭回祿殆盡報至公惟付  
之天少無不憚色識者卽知爲大器云是年舉進士尋患痔潰  
甚幾斃忽夢神語之曰爾異日當大貴豈一病所能困耶遂引  
歷生平升沈境界甚詳覺而病愈時有以進士選科道者人力  
勸就選公曰夫士束髮受書叨一第榮矣詎汲汲以赴功名之  
會哉遂告省募還庚子除湖廣黃州推官凡訊獄廩廩以移恤  
爲心惟公惟斷未嘗阿上官意以枉一人故所訊多明允而聲  
譽籍甚襄楚間會麻城尹缺臺司檄署邑事至則修明政教申



飭法令剔奸去蠹以除民害邑有宿猾鬪訟武斷爲民豺虎公廉得之立斃杖下楚人迄今稱爲神明又豪家計奪人塋地假囑要途公曰爾欲求福地而乃瘠人以肥己是自貽禍也竟卻其請因謗諸監司監司益重公可任大事撫按咸連章亟薦公癸卯徵拜禮科給事中時議莊敬太子冠讀禮公上疏曰臣誦聖諭陛下上採文成隆古之規近稽列聖已行之制酌古準今務求至當以一天下臣民之觀立帝王萬世之極甚盛典也議者祇以禮節繁多未易盡習爲言誠不足以仰體聖衷之萬一臣愚以爲禮有以少爲貴者酌而從時另具儀節候聖衷自擇



若以時令未宜亦當稽之史卜另擇吉辰明布中外疏上皇上  
特加采納云會廟議更始建論紛紜或曰四親廟不可罷或曰  
七廟古禮不可更聚訟盈庭未知所適公上疏曰帝王典禮非  
一家之私言乃萬世之憲章况事干宗廟人臣不當以擅議理  
隆作述惟明聖斯可以折衷我皇上識邁今古孝通神明兼總  
條貫于上而百執事之臣僣僣焉獻議于下以天下之公心議  
天下之公理我皇上參之以輿論之所同斷之以聖見之所獨  
部臣之議有當於陛下之心者卽可以當祖宗列聖之心當祖  
宗列聖之心者卽可以當天下一萬世臣民之心有來雍雍至止



肅肅神人和同百祥胥協而聖孝益光矣于是聖心嘉納而廟  
議始定公一疏之力殆有助焉時宗室繁衍釁孽間興若楚藩  
之變計在覆飾公互覈其報計日月之訛而繩以春秋嘗藥討  
賊之義楚獄乃定復爲條陳六事以獻一曰議處封祿二曰崇  
重恩典三曰肅閑闈教四曰禁止交結五曰飭明藩度六曰慎  
擇王府師傅疏前後十數上莫非爲國家長久深遠之計丙午  
陞戶科右給事中丁未陞左給事中復建議以爲當朝覲考察  
之期正吏治更絃濯垢之會條陳數事以上大要欲汰冗員除  
酷吏省查盤禁罰贖緩征科均徭役至巡京營則請重調遣以



肅兵威巡皇城則請嚴禁衛以崇國體颯颯乎忠言讜論皆上  
當聖心洞垂俞納中外稱之丁未謫雲南楚雄府定邊縣典史  
戊申陞福建建寧府推官其斷訊一如黃州時建有宦族子柔  
懦不能立羣奸茹之公發其事爲摘根斷節悉置于法一郡翕  
然歸心日與諸生講切文義其拔舉過百十人往往知名後以  
宦遊及門者咸推諄服德云己酉陞刑部江西司主事尋改吏  
部稽勲司主事周歷四司壬子擢文選員外郎甲寅擢稽勲驗  
封郎中丙辰轉考功尋轉文選郎中公之掌銓也著畫一之規  
祛積習之弊闢進賢之路杜僥倖之門時風憲員缺公議取陳



給舍等凡五十餘人大中丞崦山周公竟如其議無一人易者  
其于銓除量才授任罔叅以私有于託者雖不峻拒亦不肯阿  
順人意以廢公議至于聞人一善一能至銓署譽不容口弗求  
其人知丁巳擢提督四夷館太常寺少卿已未擢大理寺右少  
卿尋轉左尤潛心聽斷夙夜祇慎獄無冤民庚申擢太僕寺卿  
考牧精敏簡閱多平恕人多便之辛酉閏五月擢順天府府尹  
命甫下忽遘暑疾有勸其姑緩蒞任者公曰事君能致其身吾  
知急趨君命耳努力赴之而其病遂劇不五日竟終于長安之  
邸第縉紳莫不驚悼駭愕云公爲人直諒坦夷與人交休休無



所不容尤喜汲引後學樂道人善未嘗設一機以御人雖人以非禮相加亦惟以禮順受久乃忘之至持已守官則廉介不苟駁歷中外竝以清慎著天性孝友事雪坡公及母恭人周克盡子道雪坡公卒時伯兄五山公繼沒遺其孤志學志譽俱幼公蹕踊大慟曰父之誨予兄弟也躬自訓迪窮日夜孳孳勿怠蓋俱欲其樹立爾今予幸竊一第父忽棄世而兄又繼沒諸子孀孀罔依則教育之責非予事乎于是撫諸孤無異已出凡戶內事以身任之而又日夕嚴督經史惟懼其弗底于成事仲兄南京刑部郎中九一公先意承志惟恐弗得其歡心雖家庭言論



未嘗少忤處宗尚篤于惠愛每曰吾祖而下昆弟子姪吾一身也牽一髮則身爲之動拔一毛則心爲之惕凡可以周恤扶植者不遺餘力此可以觀其大矣性最好經史政暇誦玩每至夜分作爲詩文動中紀律有近川蕪稿掖垣奏議皆切理要裨時政之大者處閨門甚肅禮厥配恭人陳如賓課三子以學朝夕不倦其貽訓惟以忠孝爲先平生未嘗畜妾媵家居每自損約澣衣蔬食無異儒生時姿容豐偉器量宏裕士大夫僉謂必當遐遠乃遽爾長終顧不痛哉公生宏治甲子四月十三日卒嘉靖辛酉閏五月十六日春秋纔五十有八配恭人陳初封孺人



繼封恭人孝敬淑慎闡範肅然蓋女子而有士行者子男三長  
志文太學生娶屠康僖公孫女繼娶僉憲許嶽公女次志宏中  
戊午順天鄉試娶太學生朱天復女季志立丙辰進士今官禮  
部主客司郎中緝文砥行克承家學娶太平守姚汝舟女女二  
長適太學生徐善胤次適太學生朱來甸孫男六允揚允揆允  
揮允芳允元允授孫女五俱幼嗟乎予自始第卽得納交公而  
公之視予恒若有契合者遂命三子皆從余遊而不知予之無  
有也征逐餘十年無幾微小逆于心大抵公宅心長厚不見人  
過故予得見禮于公然測公所蘊殆所謂汪洋若干頃波澄之



不清淆之不濁者也脫天假之年不將大有裨于國耶而天何奪之速也及憶公嘗語予以病中夢自始仕至徵入爲給諫已被謫復內陟爲某官毫髮不爽然則生死之際顧不有命存耶沒之日予走哭公祠部君見予益大哭哀慟已拭泪請曰知予父者莫先生若敢以狀累已乃述公生平授予予念公素諛因不辭而始爲詮次之以竢立言鉅公采擇焉

京兆近川查公神道碑

徐階

嘉靖辛酉閏五月十有六日亞中大夫順天府府君近川查公卒于官其子太學生志文以計聞詔賜祭一壇命有司治葬事



于時上方慎重卹典卽于例合猶必問其人何如而公位三品未滿一考獨獲被恩數于是士大夫仰見上之知公又惜公幸旣受知而不及竟其用也公爲人凝重簡遠有黃叔子之度居常獨見謂長者耳及臨事確有定守不可以毀譽擾之使亂迫之使急至于進取之際淡如也當始舉進士時將疏請展墓或謂公宜少遲以需臺諫之選笑不應及予告還例授黃州推官尤公者雜至終笑不應其在黃州諸所讞鞫不視上官意爲重輕亦不以請託有所縱捨名拜禮科給事中上議舉莊敬冠讀禮當事者惑旁言不敢任而以禮繁難行爲解公抗疏請簡其



儀節後踰年卒如公議行之楚世子弑其父有司未能正法公覈其報計日月之訛而律以春秋不嘗藥之義獄遂定轉戶科右給事中尋轉左會朝覲考察疏陳黜酷吏禁罰贖緩征科等若干條語多犯時忌竟以言謫雲南定邊典史復爲建寧推官遷刑部主事改吏部累遷至文選郎中盡取諸條例去其舛複裁爲一定吏不得爲奸有干請者溫辭遣之卒無所撓屈間見誚責居之如常或教以迎合謝不能而起遷太常少卿改大理少卿遷太僕卿所至舉其職遂尹順天蒞事五日觸暑得疾以卒距生宏治甲子四月十三日享年五十八耳公之先出于周



以所食邑爲姓唐時師詣爲桂國南唐時文徽爲尚書宋時道  
爲龍圖待制其後有仁齋者自新安徙居海寧之園花五傳至  
都御史中丞約于公爲叔父故公祖益封南京刑部主事加封  
奉政大夫而公父繪號雪坡生四子公與仲兄南京刑部郎中  
秉直相繼以科第起查氏遂益有聞公於爲子爲弟以孝敬稱  
撫其伯兄之孤志學志譽以慈稱自爲諸生以文稱歷官以廉  
稱然未嘗自表襮與人處退然若無能者蓋其德性然也配陳  
氏封孺人又以子志立貴封恭人子男三長卽志文次志宏領  
戊午順天鄉薦次卽志立舉丙辰進士今爲禮部郎中女二長



適徐善胤次適朱來旬俱太學生孫男六允揚允揆允揮允芳  
允元允授孫女五俱幼葬以癸亥年正月二十日墓在五雲山  
之陽予自再入朝與公遊而好也遂按禮部石麓李公狀爲銘  
諸幽曰

周原瓜瓞生縣縣因邑爲姓惟查先司空柱國貴且賢尚書待  
制麻光聯

中丞首奮公繼騫宛如玉潤停如

淵勢不能懾欲不遷諫垣選部聲鏗然器可大受不永年我作  
銘詩瘞茲阡石不可朽名其傳

郡丞岐峯查公墓誌銘

茅坤



君諱志文字鳴周號岐峯子同年近川京兆公之冢子其先由歙州徙樵李再徙鹽官家園花里世以簪纓相望者也近川公名秉彝倜儻不羣多大略以禮科給事中侍肅皇帝抗疏言事杖闕下謫爲邊尉當是時公之直聲震天下尋補吏部累官文選司郎中其所拔淹振滯推挽天下豪雋之士若流水已而歷大理寺左少卿暨順天府尹而君方年少畱爲家督所攜仲弟宏季弟立朝夕惟誦有明法間亦稍稍抗父道臨之而兩弟亦父事君蘄蘄然不敢違尺寸京兆公喜甚未幾兩弟亦竝後先中科第而父子兄弟赫奕當世矣君子是時獨與沈侍御楠胡



叅政心得暨予甥孫允升輩竝以高才生結社西湖之上下帷  
讀書及諸六籍百家言絕不知戶外事予適罷官歸間過之竊  
器君抑且歎京兆公家千里駒也頃之京兆沒計聞君號慟幾  
絕科跣走京邸疏闕下天子憐之遣官賜祭葬如例君攜兩弟  
事陳恭人恭人又沒于是君首傾橐中裝千金而羨徧度湖上  
諸名山稍獲今所葬五雲之溪蓋異兆也越若干年隆慶丁卯  
君亦以南太學生中應天鄉試又十年有司數擯不以第輒謁  
選授廬州府通判君恥不及第進士而所授者又下寮不及專  
城提印以抗功名于時也臨江矢曰吾所臨官有不能奮報國



家者如此江已而抱牒佐二千石一切苞直不以入甚且屏故事卻羨稅卽如舉人所當贖錢不給處君且割俸以輸之君既多幹局又甘苦持廉若冰蘖聲藉甚于是督漕都御史吳公暨督河都御史潘公竝才君疏名以聞河所當懷仁睢寧等處最湍悍或與漢瓠子黃金堤等也君輒躬舂鍤輦竹石倣古埽法明年隄成爲上第且按宅堤所減國家費殆數千金于是諸按節交章疏君功坐無爲州太守缺員以聞詔如疏晉二級特補廬州府同知仍領州事如故當是時君旣以彊幹聲江淮間然不三年而天子所採有司之言翔貴君至此抑異數矣君子是



益自奮勵按狀所條次君之革里坊平市價飭學宮置膳田明  
獄訟省徭役建橋梁繕圩岸所畫封以內蹇蹇鑿淬不遺餘力  
大較于古循良吏傳所書不過也然其所最爲卓犖者有三其  
一州嘗旱老稚轉徙君亟擅發倉賑不爲請之撫按使君所活  
者數萬人其二蝗且蔽天君露禱蝗輒出境已而卒盡投黃河  
與白河以殫其三君嘗領部使者檄勘蘆洲舟且風覆白馬洲  
漂流數十里舟之從卒數十人竝沒而君獨從舟窟攜一吏及  
所緝州印併江防印以出嗟乎豈非君之爲民捍患奮不顧身  
而天輒假之神以顯君名業耶尋復有寶應湖之役君以功詔



加俸一級資銀十兩未幾君坐息者口抑稍稍倦遊上書乞骸  
骨吏部固留之不可得尋疏君名准致其仕以歸歸而州之吏  
民所伐石而碑上官而祠與千里而泣送之者踵且接于路也  
嗟乎君之它所爲細行若捐地葬從父秉倫及恤孤寡閭里以  
下所口畫而髮櫛之者無算大都半類漢伉直半類漢獨行予  
不暇書第擇其大指皎然縉紳大夫之耳目處內則孝父母與  
悌弟出則樹功業聲施當世可謂古傳記所稱有典有則國之  
著蔡者已君之生以嘉靖癸未九月朔日其卒也以萬歷己丑  
三月十有六日享年六十有七京兆公以君貴加贈通議大夫



而母陳恭人亦加贈淑人君始娶配屠氏已而繼娶許憲使獄  
之女竝贈宥人子男八曰允揚曰允擣曰允持竝屠出曰允撰  
側出曰允授曰允振曰允掄曰允揆竝許出女三人孫男十一  
人孫女十三人其所許聘及娶竝吳中名族允揚等十以十二  
月二十日葬之金粟山之陽或曰其所當佳山川蓋于嚮所上  
五雲山略相埒乞予銘銘曰

山爲礪兮海爲帶日月所躔兮蛟龍所薈紫氣其伏兮元宮其  
闕冠與劍履之藏兮千秋萬禩其無艾吁石可泐銘不可泐爰  
書之照耀來裔



誥贈友人查室許氏墓誌銘

曾如春

萬歷丁丑余治廬陽之數月適大夫峽峯查公亦捧檄倅廬與  
余爲同寅無何而大夫視六安篆矣視篆無何輒有賫捧之行  
已而又輒有督河之委大夫材猷表著凡地方大事大役當道  
輒委重焉以故一年之內計大夫在外者什九而在府署者什  
一乃其署所肅然豈直嚴扃鑰杜私謁亦且絕不聞兒女咕咕  
聲噫非空人內教素閑安得有此余稔知友人賢非一朝一夕矣  
明年冬十月余得命改松江未三月而卽罹先慈之痛及銜哀  
奔歸不謂空人亦于是夏逝矣何天豐其德而不豐其壽耶惜



哉辛巳之秋友人宅兆且有日大夫持憲副襟褰胡公狀不遠千里乞余銘余稔知友人之賢且重違大夫之請其何敢以不文辭按狀查室許氏以夫之貴誥贈友人友人蓋憲副少崖翁長女京兆近川公冢婦今大夫岐峯公令配也初大夫旣失配謀續之媒氏報可于許京兆公喜曰往吾得奇夢今始協必昌吾祚遂聘焉友人髫髻嗜書讀孝順事實太上感應女史等書意欣然若有契也母朱安人卒于宦邸友人大慟而絕已而甦已而復絕又復甦如是者三誓素茹終其身以爲報方朱安人病篤竊割股和藥以進不愈又晨夕焚香竊祝願損已壽益母



又不愈故其心獨痛苦如此既歸大夫尋丁京兆公變哀毀三年如素爲婦者事其姑淑人甚謹及淑人卒宐人喪之逾禮先是大夫已舉四男一女然皆雛稚宐人憐愛之如已出事大夫和敬交至惟力學篤行是勉大夫有欲助者宐人力贊成之而宐人亦時時脫簪珥罄筐篋置藥餌以施以故邑人貧不舉火者死不棺殮者病不召醫者莫不恃賴宐人之家丁卯大夫領南薦比三上春官不第則勉之曰大丈夫當乘時取功名報天子豈在躡崇秩耶大夫授廬陽倅人無不爲大夫鞅鞅者宐人謬爲誇詡好言慰之已而治郡灼灼有賢聲雖大夫之才之志



偉矣乃其夙夜在公絕不以私家計念則宐人內助之力居多  
云戊寅之冬大夫當督河淮邳會宐人病大夫意遲遲不卽去  
宐人曰臣子義不宿命豈得以妾故持二心于是大夫遂行然  
數數遣使歸候宐人宐人必強起命使者報愈病且劇諸子欲  
奔告又不許遂卒宐人生嘉靖丁酉七月十二日辰時卒萬歷  
己卯四月十九日午時年四十有三子八人允揚太學生娶朱  
氏允壽杭州府學生娶卞氏允持海寧縣學生娶吳氏允撰娶  
孫氏允授娶張氏允振聘胡氏允掄聘柴氏允揆幼未聘女三  
人長配太學生徐學鳳次配海寧縣學生吳時成次幼未許孫



男五人長聘徐氏次聘祝氏餘未聘孫女四人次許聘徐希積  
餘未許嗟查之祚信以宐人昌而京兆公之夢卒秘不傳何哉  
宐人少好讀書余覩其生平所行事得于三書者居多夫其籲  
天竊祝彼誠知有母而不知有身今則已壽損矣豈真移之以  
益母耶又聞宐人之病蓋根于母卒時嗚呼賢矣今年冬諸子  
將奉母宐人葬于龍山之東南從吉兆也余悲宐人之志爲之  
銘曰

天厚宐人以德而嗇其壽又將誰咎今爾名昌爾後是爲不朽  
百世而下觀其究



留臺友峯查公墓表

沈朝瑛

棲水距園花不五舍一衣帶水先王父就堂公授友峯查公經稱高足而先侍御讓庭公同研席余季克又授公仲子經世講非一世父子兄弟具蒙國恩簪紱奕奕稱家瑞者余亦竊比焉公之物也余役將作弗克臨其葬也會余由渝移虔道還里諸子允亮等謁吾廬而請曰先子棄世十年而後葬以簪壤故孤誠罪人也夫墓門之石乞靈劉行素先生瘞之矣疇爲表之表之非篤世諛如大夫弗章也大夫其曷以辭余惟墓無諛也矧表之也而敢諛諸然生平有媿德不求人知而關切彝倫者其



忍澗諸爰綴志狀崖略而表之公諱志宏字鳴謨其先三天子  
都宋龍圖學士後元末由仁齋公徙樵李而園花五傳封奉政  
公贈中憲公廷杖名還京兆公晚稱覺菴先生者以及公凡八  
世君家三鳳伯郡丞季叅知公中子也生而徇齊孝友天性強  
裸中得兩尊人權膝上授大學首章成誦九歲屬文讀史慨然  
慕桐江子陵之遺風焉京兆公受杖餘息復生公湯藥惟謹也  
京兆公還朝啓事赫奕天曹公寒素無改也季子先著鞭成進  
士典禮青雲公惟彙駿髦盟玉敦化北溟之鯤也聞京兆公訃  
奔哭而北旅櫬而南徼陳太淑人哀悼而性滅也爲京兆公乞



祭葬恩畢大事析箸無間言旋罹太淑人之薨哀毀猶之喪京  
兆公也者微伯氏性滅而若教餒也常平野儲公私兩病微公  
義捐善地則松楸瘞而膏脂竭也嫠妹孤甥皤皤形影邱嫂早  
世羣雛啾啾微公與朱孺人撫如已出則陟岵陟屺之悲將無  
已也花萼相輝爲歡幾何已丑郡丞叅知相繼不祿墳篋寡和  
諸從淒其微公誰與翼左右而振宗祊也自丁卯郡丞公捷後  
遂有桐江之思強而北卒以策忤斥新鄭優異之而不從郡邑  
賓筵之而不再日以養生課子爲事微胡中丞便安之請則公  
以席帽衿絲終也累襲豐豫而淡素終身壽躋耄耄而持籌亡



倦微公則慮諸亂之以米鹽分而刀錐競也詩曰教誨爾子式穀似之以覺菴先生之貽謀旣翁和樂且耽伯曰岐峯仲則友季則敬一稱謂間罔不迪之友于書云惟孝友于兄弟施于有政宣尼氏謂是亦爲政公雖不若郡丞叅知之赫聲濯靈政遠宇內乎乃孝友之政政莫則焉何減驃騎故竟公之身不及析箸公沒而三子自相調劑雍雍交讓受先世之遺亦猶公之析于太淑人時者迄今十年無間言也輓近世指可再屈哉是則孝友之世爲法則則簷溜不爽者也詎不知表而出之以軼人羣垂永裕哉若徒表以不穀之一言則贅矣公生于嘉靖壬辰



年五月廿二日卒于萬歷壬子年八月朔日享年八十有一葬于天啓元年十二月十八日卜壤于龍山北之東陳里子女婚姻已具誌狀

山東叅政紹庭查公墓誌銘

石星

萬歷歲次己丑冬月中大夫大叅查公卒于山東公署其孤孝廉允成等持大司馬沈公所爲狀匍匐京師問志于余遂以志公公諱志隆字鳴洽別號紹庭浙之海寧人也其曾大父益以子都御史約貴累封奉政大夫福建按察司僉事曾祖母曹氏贈宜人太父繪亦以子刑部郎秉直京兆尹秉彝貴累贈中憲



大夫大理寺左少卿祖母周氏累贈太恭人父秉直擢知高郵州尋晉留都刑部郎嫡母馬太宜人以夫貴誥贈宜人大夫則刑部郎九一公仲子也初大夫姪時刑部公夜夢青麟來集其庭明旦而母安人輒舉大夫矣時嘉靖甲午三月十五日也生果穎異甫十七補邑弟子員歲戊午浙闈稱捷明年己未上春官成進士時余忝列大夫榜後故得稱同年兄弟在大夫例當外任授寧國理曹政平刑一切便民者罔不舉聲聞蔚然方欲轉秩而刑部公訃至奔故里鄔安人又逝大夫哀慕痛切飭粥不適口形神如鵠捐需已產上吉兆而封之大夫有同母弟



志完病革且死大夫撫其子猶已子及長則與之婚更鬻田使  
入太學絕不以家產貨物較錙銖于伯仲間也服闋補秩分曹  
撫州下車月餘進留都駕部主事遇穆皇帝登極覃恩進階承  
德郎母鄔安人貶贈爲太安人元配祝氏誥封安人隨轉職方  
員外郎歷郎中在都素多異績是時有烏合者千數人行掠金  
陵守潔者苦莫可制大夫至使捕之得其魁首餘黨悉平最奏  
上聞得以秩滿守皖城皖城衛幕巨地指揮家多畜蒼頭日爲  
捍卒夜爲劫掠巨魁大夫入境輒得其詳遂嚴加搜剔躬自督  
更雖夜分而衣未嘗解帶且檄申道院議得巡江舊卒還備城



守尋以守城兵卒巡視外江一月之中務必兩更其所治事三月風俗一新城無夜警江不波瀾皖人咸相謂曰此吾民之豈弟也然奸民私圖未便言辭搆隙駕言兵給糧薄吾等將何以生當發庫藏以助軍需維時叛卒悉趨府庫幸大夫防範甚嚴關鍵堅若重壁從官舍出旁觀者皆爲大夫危大夫則正言厲色諭以利害不移晷間合者皆散首惡者皆已繫頸矣變聞詔逮大夫于闕下時皖郡人民道哭者盈千萬奈武弁有力者賄闈官設楛以窘大夫大夫抗疏自陳大司馬王公中丞張公皆各陳言武弁當誅大夫合行轉秩調知松江時闈官進御駕以



大夫在畱都日不謁孝陵守皖郡時不戢軍律議得降級旨下大夫怡然曰邪佞在列直道難行歸與歸與吾將老焉輒歸杭之武林者十餘年尋起爲山東鹽運司政事不煩清譽益著且心馳著述其在署則有岱史一編焉旋轉守保定時隣境飢饉葬溝壑者盈道大夫嘆曰是非王之赤子乎乃輸粟近境使民就食更輸公帑構廬郊外令流民得托而處臺使者上言循良莫如大夫最晉天津兵憲大夫入治見城皆圯議欲修葺其如歲歉何乃下令州郡勿科民資勿傷民力願役者往惰窳者聽其時力者雲集城隍頓新地夙多盜行者苦之大夫治事月餘



雖夜行亦多安堵又奏復團兵爲之守己丑春有總儲山東之命大夫將裹糧而行會潞藩詣國駕經天津在事者苦其供御煩劇非大夫不可當此于是遂畱相與共事王舟入郡秋毫不擾此大夫之才也事竣抵東藩恪其守職勵志益清以疾卒官舍時萬歷己丑十二月初七日也享年五十有六子女凡三長鄉進士允成娶吳江孝廉吳衍泉公承烈女續娶海昌太學徐慧陽公煜女仲國學生允謙娶仁和廉憲郭樂泉公孝女兩君皆祝安人出季允賢娶海昌庠生朱拱環公履儼女側室石氏出長女適海昌僉憲徐改亭公炳子邑庠生若型仲適吳興司



馬沈玉陽公子木子祠部郎傲炆季適海昌孝廉董雲泉公成  
龍子邑庠生伯禊女皆祝安人出孫男十人大觀大科大臣大  
試大憲大會係允成出大字大案大榮大勤係允謙出孫女有  
四俱允謙出其許配皆名家焉今大夫長君孝廉將扶大夫櫬  
歸葬之鄉原以志屬余余悲年諡故不辭且系以銘銘曰  
次五望六爾壽非天秉憲歷藩爾位非小廿四英揚爾仕何早  
枝秀森庶爾後非少溫恭豈弟爾懷不佻中道見折爾躬益晶  
形神遐逝爾名豈渺欽承令範乃銘爾兆



海寧查氏族譜卷八

誌狀二

江西參政虞臯查公墓誌銘

朱國楨

查公諱允元字仁卿號虞臯配李氏封宜人公家世鼎盛余起自寒士殊不相及己丑公爲客部遇于邸又九年爲江右學使者因吳疎山先生謚典得通尺牘明年公入賀拜蕭寺中又九年余副南雍公遣長倩顧生來遊再得書又二年公之豫章任緘書顧生復來余入山不及遇又四年爲萬歷辛亥冬月生衰服至則公沒已踰年且挾三嗣子乞誌銘矣先是李宜人卒公



有悼內姻言命生乞言於予引梅聖俞劉凝之故事以志屬望  
生念公意緒慘阻方與婦日娛侍以解未及請蓋謂公年僅始  
艾精神王當且永年而已亦得奮志雲霄快公末路及竟不能  
待祇煢煢奉狀譜與姻言竝請也吁惜哉余愧乏古人之文而  
慕其誼遂竝採而存之查氏自新都遷居海寧園花里始祖仁  
齋翁四傳至封僉事益遞爲贈大理左卿繪爲大京兆秉彝爲  
大叅敬峯翁志立配姚宐人生公少奇穎有骨相七歲從翁于  
春官歷膳部公曰命官之意止此耶翁誨曰禮始諸飲食公大  
悟卽有志大人之學慕薛文清爲人讀其書便自會心十四補



弟子員十七鄉試高等又次年納李宐人明年翁中讒歸癸未  
中春榜馳還座師高安教先生留之期以館選公曰余兄弟二  
人次者殤父母悲思無已時余幸成名當破涕爲笑余姑歸奉  
一卮且甲第異日自在吾何戀焉二親果大喜極人世優游之  
樂者且三年公奉侍無頃刻違卽偶退又沈酣典籍不少自逸  
學日博丙戌廷對二甲第四人授客曹翁故官也明年生子大  
啓公所誕故署也而查自敬峯翁繼大京兆迨公凡接武三世  
又一如敬峯官遂稱一時盛典無何翁沒痛毀奔歸喪葬盡禮  
服滿補故秩秩滿上書臣父廉賢者薦之不肖者毀之可據以



定品有詔歸秩封母姚太安人妻李安人適東事起力阻封議  
抗言大司馬不得舞禮侵官又特疏爭三王竝封歷客祠一司  
五年僉江西學政凡四年三試品題精當崇獎節義今皆布列  
華要顧時時與定宇南臯質疑義得粵西憲副使會太安人苦  
鬪投篆歸比行計至哀毀終喪堅不出郡邑趣裝以未葬辭又  
特疏辭不允惟勅宗祠飭祖墓賑貧之不以無爲解家居八年  
旣葬一親北上江右士大夫喜願再得爲師帥果得南昌臯不  
半年卽其地晉叅知詰盜盜息治兵兵整稅瑞占役者一概搜  
盡文學雍容政事治辦南臯先生十年一日之盟語不虛也無



何李宐人病癰卒公棄官歸日課顧生爲文惟親友吉凶與急難事間一出一日晨起謁吳本如方伯歸午餉如平時忽疾作次日瞑惟注目長女無他言曰葬我與宐人合宐人少公五歲自幼凝重讀內則孝經列女傳父常所公諱大吉以給諫官至大叅母郭淑人兩家交相慕重遂講姻書歸公僅十四事舅姑得歡在宦邸謹篋鑰內外肅肅無人聲從公入信州故常所公舊署道武陽驛常所公舊隕輿處慟哭得疾墜娠是時子大啓年十二長女亦年十七擇得顧甥喜甚疾良已旣大啓殤連喪大宐人痛甚病瘡五十日幾殆又恐貽公憂妨賓朋道誼文章



卷八  
三  
之樂輒整厲如平常至潤州癰作遂冉冉不可支矣公雖厚篤  
伉儷而溫良莊敬絕無燕媒態宏人雖事公如賓而間進幼姬  
欲廣其嗣卽屬續猶諄諄囑長女再擇以進公公又追憐不忍  
御可以觀公之夫婦矣夫禮始諸飲食公童蒙之教之端化始  
諸庭闈非公本之養正濟以學問其孰能然蓋觀公之刑家而  
其恬淡之操精純之學抑畏謙虛之度與講學問道之誠要皆  
在在實際豈與世家佳子弟掇一第歷美官抗高名而博美譽  
者等可哉公好讀書輯左國鈔故文字典雅又輯諸儒粹言奉  
以周旋無敢失當余初見公時卽心折猶謂公和粹近人是平



取公卿者乃其神清骨勁私不可干爵祿不可浼蹕絕風塵之外賢者之不易測如此而宐人又與同德勸公愛日養和信已而親人其可謂女中特達之丈夫矣公生于嘉靖庚申二月十二日卒萬歷庚戌十月初九日宐人生嘉靖乙丑十月初七日卒萬歷己酉正月初四日以某年月日合葬于大慈山陽公雖無子而付托得人旣賴顧甥欣慰于生前比沒卽告公門人仁和令樊君立嗣子三人爲大統大紀大儀仍托重于甥今又爲年譜冰雪中乞文于余余重公又見顧生暨諸子其色淡墨其辭酸楚其文詳贍于是節行諡之大志于篇而系之銘曰



文之其世有步也馳之其遵有路也約之其根有互也五一非  
天千載曰暮也同室且穴黃泉錮也子半而全天所祚也公其  
歸與山靈呵護也以爲不信豐碑樹也

太學宏所查公行述

許令典

稽古唐宣宗大中年卽稱園花市故居于此者實繁且久唇齒  
諸著姓獨查氏爲三天子都龍圖孝子之後自勝國時仁齋公  
徙茲始再傳而耕隱公浩學菴公實至一愚公益以子中丞公  
約貴雪坡公繪以子比部公秉直京兆公秉彝貴則簪纓纍纍  
矣京兆三子郡丞公志文留臺公志宏叅知公志立立生叅知



公允元三世同胞無不曳履日月之際者則跨塘一支最母亦  
京兆公以言事杖謫正直忠厚之所溉培報施安爾乎跨塘之  
以一誕八丈夫則惟郡丞公郡丞公諸子之以一誕七丈夫子  
則惟太學宏所公茲之以狀請者翩翩六龍也其所以狀者惟  
是叔父仍素公之手述則八而一存焉可嘆已公諱允持字叔  
貞號宏所行三父郡丞岐峯公母屠安人憲副九峯公女大司  
寇康僖公孫女繼母許安人憲副少崖公女當公總角以前卽  
仍素公不及記矣惟述其幼而喪母甫七齡依依許安人膝下  
猶母也長過郡丞庭躬躬爾愉愉爾終日侍無跛倚容有室叶



熊擁樹諸甯馨以娛兩尊人含飴許宐人秉家勤敏課臧獲手  
歲徂夜分不輟公亦侍候寢乃歸子舍猶侍郡丞公也有所嗜  
必羞有所購必歸有疾迎醫必虔粥劑必躬悴容函泪以進之  
已外宐人物于廬署號絕而甦徒跣奔之其事宐人于生死者  
二十許年母固不知其非已出公亦不知其非已母也每試冠  
其曹需次當廩會一士扞罔掾持牘以屬曰能三十金爲壽朝  
下檄而夕食餼矣公怫然曰彼自扞而我利之何異扼吭而奪  
之食者枵腹不爲也人皆義之居恆下帷達旦不休盛暑猶手  
一編不揮筆快意處如風生兩腋可當清凉散四闔浙聞不售



郡丞慰諭盍助汝南遊稱天下士乎公辭曰兒不肖弗克自堅  
大人廉苦無爲累密貸以成厥志肄雍業熊文墟先生一見心  
賞以田鍾台期之又點額中乙榜邀京兆賞格殊腆不勝邑邑  
也郡丞老謝家政析箸上西偏吉付公自營之細人有以低昂  
嗾公者公正色曰固我哉故廬產以廬故貴安知新廬之不故  
而產之不等故貴乎受籍以出毫無帶蒞龜勉圖之堂構蔚起  
時迎郡丞公奉菽水爲色喜亡何郡丞公不祿其慟絕復甦猶  
宐人也諸仲六七輩朝夕相嚮枕苫由營窳窳心力無不殫者  
郡丞公固善後無外侮有以惕之者公泣謂諸仲曰人第慮藩



籬耳何虞睥睨哉吾兄弟俱更事手足衛者其奚有于他時季  
弟揆最少而才公督之嚴而婉嘗撻伯禽以示儆云季弟不祚  
卒負公志悲夫時諸子俱有聲黌序間公擊唾壺曰吾年未憊  
子更衆忍令未有甯宇妨鉛槧業耶于是一意繕治延譽髦坐  
臯比以課子若韓太史孟博孫給舍太叔皆莫逆交故諸子先  
後鵲起可扶搖待也其居臨孔道余嘗過之見蔓棟奕然溝塍  
井然貴不減故廬而所拓于故者倍蓰之莫不多公治經治生  
兩進乎道然孺人內相之庸詎淺歟哉孺人父中翰亞泉公祖  
家宰默泉公非起家寒措大者也初歸不戒于火一廛不蔽中



翰公遺書曰若夫婦其來乎別業可居沃釜未櫟願其蔬糲稍盈而橐以返奚如數名數以尊人辭匪第公不欲因人熱卽孺人超然俗情不戀故棧故其淑慎之度淡素之風迄今棄栝椽三十年里閭之人人人能嘖嘖道之貫耳也至于賑貧乏庀尊曩潔齊盛無不單力從事絕無纖嗇之態則豐儉適宜若斯也家無尺土之階世承清白之裔矧受一于八而又析一爲七部署絕無窘迫支吾之艱所謂不見其長有時而益又若斯也田舍翁以三斗麥易婦公起家豐碩終身不置籩及孺人之物痛心糟糠不忍庚娶亦以食指繁夥騷除且無主者娶于熊以續



之聞其賢淑規隨于吳則孺人之貽猶善矣公始終刑于之化  
又何覲若畫一之若斯哉卜以天啓元年某月日合葬于大遮  
山之陽嗟嗟邇來青囊術熾類骨肉各天以邀福同穴之謂何  
慨也久矣有如公孺人陰陽德合生死神孚而亦效世俗析之  
以祈福不令啣恨九原無已耶故葬合于理順狀合于詞順諸  
昆弟存亡繼述之道無不順典也蕪不能不死公與孺人而藉  
手名公以其墓門之石則公與孺人其不死也夫

孝廉五玉查長公墓誌銘

沈儼爝

遲任有言曰人惟求舊世選爾勞余家世居雪之竹溪查氏世



居杭之園花凡二百六十餘年曩若者相屬也杭與霅水一帶  
用是世締秦晉好余舅叅知紹庭公余孫又長公孝廉甥舅  
遞相締也乙卯余長豫藩長公道豫偕計入燕旅次相依者半  
載庚申余建滇牙行艤舟錢塘長公飲餞于干備極驩暢裘葛  
不三易壬戌余濫南樞而長公物不兩月而余家孫婦又物相  
繼計聞江干握手遂成永別我心靈傷如之何其又八年己巳  
正月繼英爲之歸骨營兆先期以墓石請余自甲子被讒放歸  
泉石膏肓筆研弗廢久矣何能闡長公潛惟是骨肉世諒有難  
謝絕敬呵凍而志之長公諱大觀字伯寵別號五玉母氏松陵



吳孝廉衍泉公女笄歸上蔡公夢璧而娠蟹八而產人咸以大  
物期之生七日喪母鞠于王母祝安人稍長課于王父蔡知公  
岐嶷徇齊質非凡兒自叅知守上谷提兵瀛海董餉二東十餘  
年宦遊無不朝摩頂而夕焚膏也亡何卷王母孺子泣涕淫淫  
漬襟袪十六歸娶于徐因之采芹又喪王父弗克訣籲天慟欲  
絕彌昏作勞攻舉子業以圖繩祖武庚子受知洪學使廩于宮  
七八浙闈不第邑邑莫舒每遇山水良朋輒命酒自遣壬子擊  
筑北上遂歌鹿鳴而還丙辰終其尊甫喪四上公車又不第困  
頓鞍馬壬戌幾斃于膝臥病歸不臘而卒止一子奕繼甫五齡



而孱諸猶子繼英質穎性粹長公絕憐愛之弱冠青其衿居恆  
每屬英曰吾兒長若字之若同胞罔貳心吾兒殤若後吾猶吾  
子亦罔攸貳似預卜已不永嗣不延者丙寅突繼果以疽潰殤  
徐媪從哀痛中卽聚族以遺言告廟後繼英而蚩蚩者攘臂起  
質于余余曰外戚等戚耳何彼此左右袒之有惟遺命是聽七  
鬯之執繼長外無可議矧長公生平十九旅居不問生產雀鼠  
耗之那得餘貲以當穿屋牙角與內弟璧渙少力持大義又得  
當道者片言以定我舅叅知公以下實嘉賴之長公爲不亡矣  
生卒昏嫻具許郡伯狀是年正月庚申葬于靈泉山之東偏系



之銘曰

靈泉東靈泉東嶙峋中四山如幃橋如虹橋如虹卜吉允臧查  
長公查長公子長子繼而志兮述而事述而事永而祀疇嗟餒  
而若敖氏

查瀛海先生墓誌銘

曹勲

查氏爲海昌右族世居園花里世廟時近川公秉彝登戊戌進  
士官戶垣疏劾分宜相拜廷杖旋起謫官至大京兆京兆公生  
三子長岐峯公志文隆慶丁卯舉人官廬州郡丞次友峯公志  
宏嘉靖戊午舉人官都察院都事次敬峯公志立嘉靖丙辰進



士歷官河南叅政敬峯生虞臯公允元萬歷癸未進士提學江  
右晉大叅無子請子於長房兄宏所公乃以其第三子後焉卽  
公也公諱大統字君一別號瀛海早慧能文幼失恃事繼母熊  
至孝大叅公愛之及長娶朱孺人爲侍御龍臯朱公孫女婉孌  
勤春得姑嫜歡至大叅公沒始應當璧之兆而猶依依不忍遠  
其同父昆弟也已未庚申間余讀書龍山與查氏諸季爲文字  
交有挾刺相過者清睂修幹如出其羣知爲大叅公之嗣子君  
一也別三十餘年烏衣羣從強半零落避世堊老無由一致生  
芻今年小春有孝廉君繼甲捧狀踵衡宇坐而道故乃知所請



者卽君一公也噫余能已于言哉方公之承嗣也三世簪紱之餘實已消于百孔鼠雀之耗引瘠引老有孝廉君所不欲言而余少時聞諸羣從之言者公夷然處之謂所急者若敖之餒耳邊問陸賈之金索遺填戶朱孺人脫簪珥佐償之曰積金敗名懷安敗生我知有操作耳何知有先業由是公得肆力于學遊南雍與同舍生抽書射覆不遺一字不售卽歸而延名師課子弟視王家瓊謝家笏俛仰間可掇取耳浙有學使者爲大叅門下士檄郡邑訪後裔公終不一通姓名卽諸子試事必不令其以竇進也杜門擁書澹若寒素朱孺人復佐以辛勤緝緝二十



年間業日起而里中緩急有叩必應歲祿吏墨催科如虎公爲  
窮民代輸逋稅全活數百人于是義俠之譽翔于里郇會邑有  
巨豪吳中彥者以賄敗當事坐贓十萬有司計無所出乃以豪  
業昂直派售民間富民展轉營脫遂嫁禍于公公慨然曰我不  
任誰當任者我不忍壑其鄰也傾資輸官而業亦垂罄矣乙酉  
以後滿地萑苻舟人敵國公急移家避地而室廬資斧盡付劫  
灰遂抱病而終當此流離兵燹之際而經營窳窳旬日告成皆  
朱孺人力也孝廉君捧狀而泣曰曩者荒竄之餘倉皇負土聊  
且卽安尚缺隧道之石客歲上公車重理舊硯冀以慰九泉奉



三鼎而先慈忽溘然背養抱恨終天敢托所以不泯沒于一人者噫微君言余能已于言哉按公生萬歷癸未八月卒順治丙戌八月享年六十有四朱孺人生萬歷己丑九月卒順治辛卯十月享年六十有三子三長繼甲壬午舉人娶高安令朱公鼎梅子孝廉節若公女次君翰廩膳生娶孝廉張公元岫女次夢龍娶少司空祝公耳劉子文學文叔公女女三一適兵馬司陳公吉甫子文學旭永一適光祿署丞徐公欽庭孫文學林蓀一適永春令孫公印旋子文學琬孫男七做娶太學錢公元同女嗣溶聘兵科虞公乾陽子孝廉在欽公女嗣禹未聘俱甲出嗣



寅聘太學裴公右之女嗣辰聘東兗道陳公魯直子明經振孫  
女嗣申聘文學張公弦伯女俱翰出夢龍早世以應嗣立兄甲  
之子九垓爲子娶編修陳公昆湖子太學當時公女孫女二甲  
出者一字文學陳公令升子詵翰出者一未字曾孫一克揆敞  
出未聘曩余攜笈園花時所識查氏羣從十餘人皆楚楚士行  
而鮮克自振于科名者時固當中葉耶觀公祖父三世代爲聞  
人公僅一縫掖而以仗義行仁蘊薪傳之炬今孝廉昆季且振  
振繩武矣則涪翁所謂士大夫之種子也今以某年月日合葬  
于園花里藍玉橋之北爰爲之銘銘曰



于公之間甯僂而趨薛公之田甯讓其腴土也驥櫪婦也鹿車  
謙爲福種忍爲德興侈者不足儉者有餘是宜胥樂于偕老之  
墟以觀其後之奮起者徐徐

孝豐學博公權查公墓誌銘

朱朝瑛

查公諱大經字公權其先由新安徙居鹽官之龍山里世紆青  
紫曾大父覺菴先生抗疏彈劾權貴直聲動天下王父岐峯先  
生河工奏最游膺錫命父仍素先生理學鉅儒屢聘鄉飲大賓  
不就醇風高節世以爲榮母張孺人初舉公穎異迥常兒髫年  
以第一人補弟子員下帷如董子試輒冠軍食廩餼吳中文社



蔚起必爭致以相引重余得後先托交肺腑云若其孝行誠篤  
尤天性也事二人色養惟謹母孺人病篤刲股肉療之尋愈視  
昆季幾忘所謂爾我者胸懷坦易與人酬對醉以醇醪歡然無  
忤然當大義慷慨不阿無少撓挫晚以歲薦挾策天子之庭壯  
心不衰爲歌老驥伏櫪之章未嘗不烏邑也丙子復就試北闈  
又報罷公曰吾今知所謂時命者遂謁選授茗之孝豐學博口  
不道家人產生計日絀然好施與不厭故舊窮交乞覓廣文先  
生一瓊如水俸資不堪自給日噉苜蓿而腹果然嘗戲謂吾甯  
爲曼倩不爲侏儒諄諄課諸生焚膏繼晷貧者膳之四年如一



日取之稱貸不顧也。以故人士感奮益相規切。邑二十年無登賢書者。已卯遂雋。兩人咸推公勸掖之力。直指公特薦例。應轉官。會庚辰夏大旱。拜禱赤日中。令丞尉少憇。公獨弗憇。以是積暑成疾。遂不起。蓋其急公惠民如此。俾早膺州郡。廣慈愛以濟羣生。雖古循良。曷啻焉惜。未竟其用而沒。嗟乎天道尙有知哉。公權抱伯道之恨。顧自能達觀。未艾時卽遣羣妾。擇弟緯之子。保繼告先人之廟而嗣之。曰第使承祧。有人何必兄弟之子。非子乎。配徐孺。人家女。當先生未仕時。椎結布衣。篝燈佐讀。未嘗有倦容。奉舅姑。惟謹。里中雖無車馬客。然一二親知時時過。



從先生欲奉觴爲壽野菽山肴咄嗟立辦先生善病孺人蓬首垢面不解帶以事湯藥夜分潛出露禱願以身代故得追隨扶掖以終天年孺人無愧古淑媛矣公生于萬歷癸未六月初六日卒于崇正庚辰七月十六日享年五十有八孺人生于萬歷壬午十月十三日卒于崇正辛巳十月初十日享年六十嗟乎伯鸞清高德耀婦順馬鬣之封其峙霄壤矣先生弟緯高義薄雲世推古道雖承先生治命立巳子爲嗣然念幼弟典爲仍素先生系業多男可承七鬯卽舉其所遺資產及歲課所入銖錄寸計登之尺籍付紀綱爲營窀穸餘悉以授典之子泓繼至於



保繼則稱孤子哀子竝不令資毫末也嗚呼仁哉公未有吉壤  
弟緯卽以已竹葉灣地有當青烏家言十二月十三日合葬  
公伉儷令泓繼同其子保繼儼然衰經捧狀乞銘于余以余與  
公同爲徐氏館甥又同研席知公莫余若也諒當載筆其何敢  
辭銘曰

黃鐘輟矣公其咸譔蕭艾榮矣公其蘭蕙公仕弗顯公道則亨  
懿哉孺人婉孌淑貞佳地鬱鬱某山之側釜如堂如以安魂魄  
景行高風仰彼勞勩陵谷有遷斯銘不泐